

Eso Osuse mi abo mgbi iJɔn

Elodze yee inggise

¹ Mi owita-wita mgbi ese ma Elodze dze, Elodze na dze yi Imgbasho, Elodze na di li Imgbasho.

² O dze yi Imgbasho mi owita-wita mani.

³ Alungwo ngwi Imgbasho ta duu nye mbon, ni li Ongwu bayo ungwo ngwi Imgbasho ta duu o ki ta ba.

⁴ Li mbon ngwi oshishe dze, ma oshishe na li osa mgbi inggise.

⁵ Osa na di gbosa mi iifu kpaa iifu difwin gbe ba.

⁶ Imgbasho kye inggise oka deso ba, iyin di iJɔn.

⁷ O ba ikye owa nu obwendε mgbi osa na, adzi ni inggise duu noyeye mi osa nani.

⁸ Li ongwu abuan li osa ma ba, o ba ikye owa kyo osa na obwendε ta.

⁹ Osa otsitsi nka nu ali inggise odifwi-difwi ma ka kyema le ba ese neni.*

¹⁰ O teyi dze ese neni, dafi Imgbasho ta ese ne mbon ne kpaa, emi ese difwin ba.

¹¹ O ba mbi ama nli mgban kpaa a gbela gban ba.

¹² Nghaduukpaa ama ngban mani, mbi ama nnoyeye mi iyi mgban ma, o nu ma ofe oyee emi ongwe Imgbasho,

* **1:9 1:9** Naadi nene li osa otsitsi nka nu odifwi-difwi mbi ali inggise ngwu ba ese neni.

¹³ engwɛ ngwu a mba ma mi mmbwɛ yi eyi ba, hona mi ɛwɛ otseɛtse mgbi inggise owamyɛ naadi mi owitukwu mgbi obongyaa ba, kpaa nli ombaamba mgbi Imgbasho mi onodzi mani.

¹⁴ Ta Elodze na yɛɛ inggise wa dze yi eyi. Eyi di okwɔkwɔ mgban, okwɔkwɔ mgbi Ongwɛ Imgbasho Onyi kpokpo, ntɔkyɛ mbi Otse Imgbasho, ngwu elela mgban mbwo le fɛ-fɛ bɛyi otsitsi nani.

¹⁵ IJɔn kɔ obwendɛ ikyon. O di gbɔ mi ela okwukwo gbɛɛ, <<Nɛnɛ li ongwu ani gbɛɛ, <Ongwu nkyɛ ani iyikpa ma o ngha ani, ikyekyɛ o teyi ani dze.> >>

¹⁶ Elela mgban nle dzii ikye eyi nɛ, nu eyi duu gbumse idzidza-dzidza.

¹⁷ Bana a kye ola nu mi abɔ mgbi iMose; elela bɛyi otsitsi ba mi abɔ mgbi iYesu iKrestu.[†]

¹⁸ Inggise onyi di Imgbasho ye ba, sede li Ongwɛ onyi kpokpo ndi li Imgbasho mi otsitsi di wodze ifafo yi Otson nani, li ongwu tso eyi dafi Imgbasho dze aali.

*IJɔn okyɔ iBatisima tangwɛ gbɛɛ
ongwu li iKrestu ba*

¹⁹ Onɔ oka nɛ, engyukwo emi iJuda ama nto iJerosalin dɔ ama ofife mgbi Imgbasho bɛyi emi iLevi ɛsɔ nu ma ka byi iJɔn ita gbɛɛ, o li emɛ.

²⁰ O kye da ma ba, o gbɛɛ, <<Ani li iKrestu ma ba.>>

²¹ A byun gbɛɛ, <<Nghama abu li emɛ? Abu li Elaijaa?>> O gbɛɛ, <<Ei li ani ba.>>

<<Abu li oyegbɔ maa?>>

O gbɛɛ, <<Ei.>>

[†] **1:17 1:17** Ongwu Imgbasho zondɔ gbɛɛ o ka ba wa dulu ɛsɛ wato ma.

22 Mi ongyɛngye nɛ a si byun gbɛɛ, <<Abu li emɛ? Nu eyi elodze ngwi eyi ka yilen ka nya ama ndɔ eyi esɔ ntonani. Abu gbɔsinɛ mi ikye ewabu? >>

23 IJɔn nu ma uka mi elodze mgbi oyegbɔ Adzaya gbɛɛ, <<Ani li ela mgbi ongwu nle kwu mi okwɛsɛ gbɛɛ, <Mɛlu ofɛ mgbi Otɛ no byi yeyɛ.> >>

24 Ama ngwu a dɔ ma esɔ ma li emi iFarasi.

25 A byun gbɛɛ, <<Ni abu li iKrestu, naadi Elaija, hona oyegbɔ kpaa ba ma, i kyɔsinɛ ngwi abu le kyɔ inggise iBatisima?>>

26 IJɔn nu uka gbɛɛ, <<Ani le kyɔ inggise iBatisima yi eni, kpaa inggise oka kwudze idzidze mgbi ema, ongwu ema yon ba.

27 O kyɛ ani iyikpa, odi okpafɔ mgban kpaa ani mɛ oshɛ ba.>>

28 Ungwɔ ntonɛ duu kiyayi mi iBetani, mi oyombo ekyoo iJɔdan, imbe ngwi iJɔn le kyɔ inggise iBatisima mani.

Dii ongwummala mgbi Imgbasho

29 Tegblifan iJɔn di iYesu kyɛ le ba mbon nɛta o gbɛɛ, <<Dii ongwummala mgbi Imgbasho, ongwu nkɔ kyɛlu alobube mgbi ɛsɛ mani!

30 Li ongwu ani nya ema odze mgban gbɛɛ, <Inggise oka kyɛma ngwu ngha ani, ikyekye o teyi ani dze.>

31 Ani abuanɛ kpaa nose yon ba, kpaa itɔdze ngwi ani ba le kyɔ inggise iBatisima yi eni ma, li ikye okyon tso mbi emi Israi.>>

32 Ta iJɔn si nu ma obwendɛ neni: <<Ani di Onodzi Osaan tashulu mi esho dafi anyama mani wa tila dɔnke ewo.

³³ Ani kika yon ba, nghaduu Imgbasho ndo ani eso owa kyo inggise iBatisima yi eni ma nya ani gbɛɛ, <Ongyulo ngwu abu di Onodzi mgbi ani tila donke ewo ma, li ongwu ka kyo inggise iBatisima yi Onodzi Osaan aali.>

³⁴ Ani di kyo obwende gbɛɛ nene li Ongwe Imgbasho.>>

Engwafɔ mgbi iYesu emi ababo

³⁵ Tegblifan ne iJón diye kwudze yi engwafɔn nghi efa.

³⁶ Ngwi o dili iYesu nye le lu neta o gbɛɛ, <<Dii, li Ongwe Mmala mgbi Imgbasho ma aani!>>

³⁷ Ngwi engwafɔ mgban ntonɛ fwo odze ngwi o gbo neta, a kyedo iYesu.

³⁸ Ngwi iYesu kyata di ma kyan iyikpa ne, o byita gbɛɛ, <<Li ekye ngwi ema mina?>>

A gbɛɛ, <<Otsetse, li mi ole ngwi abu dze?>>

³⁹ O gbɛɛ, <<Ba ta ema ka di.>>

Man a ke ka di imbe ngwi o dze mani, diye dzeɣan mi egbe na ololo duu. Ono li obyɛ ene ongwɛ onode sini.

⁴⁰ Andru, ongwunɔ iSaimon iPyita, li onyi mi idzidze inggise efa ama nfwo odze ngwi iJón gbo di kyedo iYesu mani.

⁴¹ Ungwo ababo ngwi Andru kyo yo, o pita iSaimon ongwunɔn nyan gbɛɛ, <<Eyi tu Onagbe ngwu Imgbasho zonu ma wa>> (ongwu nli iKrestu nani).

⁴² Ne o si kyon luba mbi iYesu.

IYesu din ine si gbɛɛ, <<Abu li iSaimon ongwɛ iJón. A ka kwu abu di iKefa>> (ngwi a li kwun di iPyita, ngwi itan li ikwutse nani).

IYesu kwu iFyilipi beyi iNatanië ela

⁴³ Tegblifan iYesu wewo le lu iGalalia. O wa tu iFyilipi si nyan gbɛɛ, <<Kyɛɔ ani.>>

⁴⁴ IFyilipi li inggise mi iBetsaida imbe onyi yi Andru beyi iPyita.

⁴⁵ IFyilipi tu iNatanië si nyan gbɛɛ, <<Eyi tu ongwu iMose lɔ odzɛ mgban mi afɛ mgbi ola, ongwu ama ogbɛɛ kpaa lɔ odzɛ mgban nani, iYesu ongwi iNadzareti, ongwɛ iJose.>>

⁴⁶ Ta iNatanië byita gbɛɛ, <<Ungwɔ osuse ka yagba tɔ mi iNadzaretii?>>

IFyilipi gbɛɛ, <<Ba wa di.>>

⁴⁷ Ngwi iYesu di iNatanië kye le to kwɛkwɛ nɛ, o gbɔdzɛ mi ikpewon gbɛɛ, <<Nɛnɛ li inggise Israi otsitsi, ongwu atsika onyi dze mbon ba.>>

⁴⁸ INatanië byita gbɛɛ, <<Abu kyɔsɛnɛ ye ani?>>

IYesu nu uka gbɛɛ, <<Ani di abu ngwi abu ka dze ita andundu duuse ni iFyilipi wa kwu abu ela.>>

⁴⁹ Man iNatanië byakpa ghatɔ gbɛɛ, <<Otsetse, abu li Ongwɛ Imgbasho; abu li Uto mgbi Israi.>>

⁵⁰ IYesu gbɛɛ, <<Abu noyɛyɛ ikyekye ani nya abu gbɛɛ ani di abu mi ita andundu. O ka wa di ungwɔ ama nshewo ngha ntona kpaa.>>

⁵¹ O diyɛ kiyayi gbɛɛ, <<N nya ema otsitsi, ema ka di esho ka kwulu lake asisa, engyɛsɔ mgbi Imgbasho kale kɛ esho yɛ ba esɛ mbi Ongwɛ Inggise.>>

2

IYesu kyata eni yɛɛ enɛekwɔ

¹ Mi egbe ongwu ta ma eba okwokyii kwokyɛ dɛɛ ogalu iKana mi ɛsɛ iGalalia. Onɔ iYesu dɛɛ ele,

² nɛ iYesu yi engwafɔ mgbɛn kpaa a bɔ ma eba okwokyii kwokyɛ nani.

³ Ngwi enee kwɔ wa ngyɛ nɛ, onɔ iYesu nyan gbɛɛ, <<A sulu enee kwɔ wuba.>>

⁴ IYesu nyan gbɛɛ, <<Onɛn, li ekyɛ ngwi abu kye ani le woke ele? Onɔ mgbɛn ani gyo waba.>>

⁵ Onɔn si nya engbidɔ ntona gbɛɛ, <<Kyo alungwɔ ngwi o nya ema duu.>>

⁶ Atankpɛ akwutse mgbɛn eni nghi egyin to kwekwe mi imbe nani, itɔ ngwi emi iJuda li sa ewoma mi odzɛɛdɛɛ aletɔ mgbɛn ama mani, ali atankpɛ li kye ikpɔkpɔ eni mɛ osu lu osudiwyo.

⁷ IYesu nya engbidɔ ntona gbɛɛ, <<Kweni mbwo atankpɛ ntonɛ na.>> A si kweni mbwo ma kyɛɛ kyɛɛ.

⁸ Ta o nya ma gbɛɛ, <<Onɛnɛ yo, mwa ka nu ongyukwo mgbɛn oga nɛ tsatso na.>>

A si kyo dafi o gbɔ mani,

⁹ man ongyukwo mgbɛn oga nɛ mbadi eni ngwi o kyatan yɛɛ enee kwɔ nani. O ye imbe ngwi enee kwɔ nɛ tɔkyɛ ba, kpaa engbidɔ ama nkweni ma ye. O kwu obongyaa ofufe ela lu enggengga,

¹⁰ ka gbɛɛ, <<Ali inggise li teyi kye enee kwɔ osuse tase se wa kye obube ba olele onɔ ngwi ingyoga wa ungwɔ kpakpa mani, nghaduu abu kye osuse da nghataa ba onɛnɛni.>>

¹¹ Nɛnɛ li ambɛ okwulewo ongwɛ ababo ngwi iYesu kyo mi iKana mi iGalalia. O kye okwɔkwɔ mgbɛn tso, nɛta engwafɔ mgbɛn si kye oyeyɛ onuunu mgbɛn ama byike mbon.

*IYesu gbosa ozu okwukwo osunu
Imgbasho mi iJerosalin*

¹² Ungwɔnɛ wa ngye man o lu iKapenahun yi onɔn yi emi ongwunɔn bɛyi engwafɔ mgban. A la imbe na egbe efa.

¹³ Ngwi oga owe owatɔ-watɔ mgbi emi iJuda na wa dɛ kwɛkwɛ nɛ, iYesu lu iJerosalin.

¹⁴ O ka to ifoozu okwukwo osunu Imgbasho mi iJerosalin nani, o di inggise tole kye mnda, mmala yi anyama le gya, angbeka soto ewo adinyatse tole nyine awuya.

¹⁵ Ta o shi onitse mi osha, si lo ma onya duu tase mi ifoozu okwukwo osunu Imgbasho, bɛyi emi mmala yi mnda tsatsa; o kye ganya awuya mi adinyatse mgbi ama onyine awuya di kyi kyata adinyatse ma tukwu ese.

¹⁶ Ama nkye anyama le gya ma o nya ma gbɛɛ, <<Gbelu ungwɔ ntonɛ tase mmɛnɛ na! Kɔnɛ ngwi ema kyata ozu mgbi Otsani yɛɛ idu!>>

¹⁷ Engwafɔ wɛ dafi a lo gbɛɛ, <<Okpitukwu mgbi ani mi ikye ozu mgbi abu le gbɛ mi itukwu mgbi ani dafi ola mani.>>

¹⁸ Emi iJuda byita gbɛɛ, <<Li ali ambɛ okwulewo ngwi abu ka yagba tso eyi zukwu ni eyi difwi mfye ngwi abu sulun se kɔ ito ungwɔ ntonɛnɛ?>>

¹⁹ IYesu nu ma uka gbɛɛ, <<Gbobu ozu okwukwo osunu Imgbasho neni, ta ani ka yilen mbɛ mi egbe eta.>>

²⁰ Emi iJuda byun gbɛɛ, <<I kye onova ngwusefa dɔn egyin ombɛ ozu neni, nghanɛ abu ka yilen mbɛ mi egbe eta taa?>>

²¹ Nghaduu ozu okwukwo osunu Imgbasho ngwi o le gbɔdzan na li ewo mgban.

²² Mi onɔ ngwi a wa kyilon mi ikwongye ma se engwafɔɔn wa ka wɛ odzɛ ngwi o teyi gbɔ nani. Man a si noyɛyɛ mi afɛ bɛyi elodzɛ ngwi iYesu teyi gbɔ.

²³ Dafi o ka dzɛ iJerosalin mi oga owɛ owatɔ-watɔ mgbi emi Israi nɛ, inggise kwuba di ambe okwulewo ama ngwi o le kɔɔ nɛta, a noyɛyɛ mi iyi mgban.

²⁴ Nghaduu iYesu gbela kye ewon nu ma ba, bana o ye ngyɛ ali inggise duu.

²⁵ O mina obwendɛ mgbi inggise ikye inggise ba, ikyekye o teyi ye ungwɔ nwodze mbi inggise mani.

3

iNikodemu kɛ mbi iYesu

¹ Inggise iFarasi oka nose dzɛ iyin di iNikodemu, o li onyi mi idzidzɛ mgbi ama o gbe emi iJuda teyi.

² O ba mbi iYesu mi otu wa nyan gbɛɛ, <<Otsetse, eyi ye abu li otsetse nkyɛ mbi Imgbasho. Bana inggise onyi ka yagba kɔɔ ambe okwulewo ama ngwi abu le kɔɔ nɛ ba ni Imgbasho dzeyan bayɔ.>>

³ iYesu nu uka gbɛɛ, <<N le nya abu otsitsi, inggise onyi ka yagba di esuto mgbi Imgbasho gbɛ ba se ni a yilen mba akpe efa.>>

⁴ iNikodemu byita gbɛɛ, <<A ka kyɔsinɛse yile inggise mba ngwi o yɛɛ omyinɛ nɛ? O ka yagba yɛ kaka ifu mbi onɔn akpe ongwu fan ni a yilon mba gbɛɛ?>>

⁵ IYesu gbɛɛ, <<N le nya abu otsitsi, inggise onyi ka kaka esuto mgbi Imgbasho ba se a ka mban mi eni beyi Onodzi.

⁶ Mmbwɛ yi eyi li mba mmbwɛ yi eyi, Onodzi li mba onodzi.

⁷ No ka kwulu abu ewo mi odzɛ ngwi ani gbɔgbɛɛ, <Se a ka yile abu mba na ba.>

⁸ Awo li fa lu imbe ngwi i mina. Abu ka fwo owulu-wulu mgban kpaa abu ka ye imbe ngwi i tɔkyɛ hona imbe ngwi i le kɛ ba. Li ngha ndzɛ yi ali inggise ngwu a mban mi Onodzi aali.>>

⁹ Nɛ iNikodemu byita gbɛɛ, <<Ka kyɔsinɛse ungwɔnɛ ka dzɛ ngha gbɛ?>>

¹⁰ IYesu gbɛɛ, <<Ngwi abu li otsetse mgbi emi Israi nɛ kpaa, abu yagba difwi ungwɔ ntonɛ lo?>>

¹¹ N le nya abu otsitsi, eyi ye ungwɔ ngwi eyi le gbɔ, eyi dɛle nu obwendɛ mi ungwɔ ngwi eyi di, nghaduu ema gbela yi obwendɛ mgbi eyi ba.

¹² Ani gbɔdzɛ yi abu mi ungwɔ ongwi ɛsɛ nɛ kpaa abu noyɛyɛ ba; ma ka kyɔsinɛse ngwi abu ka noyɛyɛ kini Ani gbɔdzɛ yi abu mi ungwɔ ongwi esho?

¹³ Inggise onyi kpaa kɛ esho ye ba se li Ongwɛ Inggise nkyɛ esho nɛni.

¹⁴ Dafi iMose nose byi ifa kyilen esho mi okwɛsɛ na li ngha a ka wa kyile Ongwɛ Inggise esho kyɛmɛ aali,

¹⁵ adzi inggise ngwu noyɛyɛ mbon yɔ no ka dzili ba, kpaa no tu oshishe gyegwu.

¹⁶ <<Lubana Imgbasho di ɛsɛ nɛ kpan itukwu jo o kye Ongwan onyi kpokpo nu, gbɛɛ ali inggise nnun oyɛyɛ ta no ka dzili ba, kpaa no tu oshishe igyegwu.

17 Bana Imgbasho dɔ Ongwan esɔ ba esɛ ikye owa fwo esɛ ikwɔ nun obube ba, kpaa li ikye ni esɛ wato ikpewon.

18 Ali inggise nnun oyeye yɔ o ka dzili ba, kpaa ali inggise nnun oyeye bayɔ teyi dzili wa ikyekye o noyeye mi iyi mgbi Ongwe Imgbasho onyi kpokpo na ba.

19 Nene li ikwɔ ma aani: Osa ba esɛ neni, kpaa inggise nghao mina iifu ngha osa ikyekye okyɔɔkyɔ mgbi ama li ibwubwe.

20 Ali inggise nkyungwɔ ibwubwe yɔ, o di osa lanyi nghane o ka gbela ba imbe ngwi osa dze ba di ali ibwubwe mgban wa dɔ ododa.

21 Nghaduu inggise nkye otsitsi teyi yɔ, o ka ba imbe ngwi osa dze zukwu nu ma difwi saan gbɛɛ ungwɔ ngwi ongwu kyo ne kye mbi Imgbasho.>>

Obwendɛ mgbi iJɔn ikye iYesu

22 Ngwi ungwɔne wa nye neta iYesu yi engwafɔn tase lu ikpɛɛ iJudia, ka kye egbe gwee yi ama le kyo ma iBatisima.

23 Onɔ na iJɔn kpaa le kyo iBatisima mi Ayenɔ kwekwɛ yi iSalin, ikyekye eni kwoba ba, inggise dile ba tonya ba gbɛɛ ni iJɔn kyo ma iBatisima.

24 (Ungwɔne li onɔ ngwi a kye iJɔn wo obawi waba mani.)

25 Angwodze tɔ mi idzidze mgbi engwafɔ iJɔn angbeka beyi inggise iJuda oka mi odze ewo ofwɔɔfwɔ.

26 A ba mbi iJɔn wa gbɔ yan gbɛɛ, <<Otsetse, inggise ndze yi abu nose mi oyombo iJodan ongwu abu kyo obwendɛ saan mi ikyon na, o le kyo iBatisima, ma ali inggise duu le lu mbon.>>

²⁷ IJɔn nu uka mi odze ne gbɛɛ, <<Inggise ka yagba kyungwɔ ba sede ni Imgbasho ongwɔ esho kye nun yɔ.

²⁸ Ema abuema ka kɔɔ obwendɛ gbɛɛ ani teyi nya ema gbɛɛ, <Ani li iKrestu ma ba a dɔɔɔɔ ani esɔ teyun ta.>

²⁹ Ongyaa ofufe li mgbi obongyaa ofufe. Uka mgbi obongyaa li fwoofwo yi obongyaa, o di li mbwo yi atsa onɔ ngwi o fwo ela mgbi obongyaa mani. Atsa na li mgbi ani, di li ngha ngwi atsa mgbi ani li mbwumbwo aali.

³⁰ IYesu ka sheeshe lu iyayi, ani ka yɛɛyɛ esɛ.

³¹ <<Ongwu nkyɛ esho ba ma ngha duu, ongwu ntɔkyɛ esɛ ma li mgbi esɛ, o li gbɔdze dafi inggise nkyɛ esɛ. Ongwu nkyɛ esho ma ngha duu.

³² O kɔɔ obwendɛ mi ungwɔ ama ngwi o fwo diye di, kpaa inggise onyi gbela yi obwendɛ mgban ba.

³³ Inggise ngbela yan gbela gbɛɛ Imgbasho li otsitsi.

³⁴ Lubana ongwu Imgbasho dɔn esɔ ma gbɔ elodze mgbi Imgbasho, Imgbasho nun mfyɛ mgbi Onodzi odondu ba.

³⁵ O kpa Otɔn itukwu o di kye alungwɔ duu dɔn ubɔ.

³⁶ Ali inggise ngwu nu Ongwɛ oyɛyɛ yɔ dze yi oshishe ogyegwu, ali inggise nfwɔ Ongwɛ yɔ ka di oshishe ba, lubana itingga mgbi Imgbasho ka dzɛyan gyegwu.>>

4

IYesu gbɔdze yi ongyaa iSamaria

¹ Emi iFarasi fwo gbɛɛ iYesu nghao le tu ama okyedɔn dile kyɔ ma iBatisima ngha iJɔn,

² yama li iYesu abɔn le kyɔ iBatisima ba, kpaa li engwafɔɔn le kyɔ.

³ IYesu wa ye nghanɛ man, o dzata ayese mgbi iJudia yidɔ lu iGalalia.

⁴ I wogyɔ ngwi o ka nyɛ ongwi iSamaria.

⁵ Nɛ o wa to igeli mgbi iSamaria oka ngwi a li kwun di iSika, kwekwɛ yi ongwɛ imbe ngwi iJeko kye nu iJose ongwɛn nani.

⁶ Ibuga mgbi iJeko dze imbe nani, dafi indɛ mgbi agaba kwu iYesu nɛ, o sise mi ewo ibuga ngwi onɔ dɔ idzidze ude sini.

⁷ Onɔ ngwi ongyaa iSamaria ba owa kweni nɛ, iYesu byun gbɛɛ, <<O ka nu ani eni owawa wɛ?>>

⁸ (Engwafɔ mgban lu ifu igeli oka gya ungwogye.)

⁹ Ongyaa iSamaria na nyan gbɛɛ, <<Abu li inggise iJuda, ani li ongyaa iBatlomi. Kyɔsinɛse ngwi abu le bɔ ani eni owawa?>> (Bana emi iJuda li kwokyi yi emi iBatlomi ba.)

¹⁰ IYesu gbɛɛ, <<Ni abu ki ye umba mgbi Imgbasho ndze mi ikye mgbi abu beyi inggise nle bɔ abu eni owawa nɛ yɔ, abu kika bɔ ta, o kika nu abu eni mgbi oshishe.>>

¹¹ Ongyaa na gbɛɛ, <<Ongyukwo, abu dze yi odi okweni ba, ibu nɛ kɛ ma abu ka tu eni mgbi oshishe nɛ mi ole?

¹² Abu shewo ngha otseyi iJeko nkye ibuga nɛ nu eyi di weni mi ele abuon, ngwi engbɛ mgban kpaa wa beyi ifyungwɔ mgban naa?>>

¹³ IYesu nyan gbɛɛ, <<Ali inggise nweni nɛ yɔ ekweni ka yɛ kwun,

¹⁴ kpaa ali inggise nweni ngwi Ani kye nun yɔ ekweni ka kwun wuba. Mi otsitsi, eni ngwi Ani kye nun na ka yaan uteeni di kale fɛ nghataa kaka oshishe gyegwu.>>

¹⁵ Ongyaa na nyan gbɛɛ, <<Ongyukwo, nu ani eni nani adzi ni ekweni ka kwin wuba, nin di nya yi eni owa kwɔɔkwɔ.>>

¹⁶ IYesu nyan gbɛɛ, <<Ka kwu obabu ela no ba.>>

¹⁷ O gbɛɛ, <<Ani dze yi ongyulo ba.>>

IYesu gbɛɛ, <<O gbɔ ayin dafi abu gbɛɛ abu dze yi ongyulo ba nani.

¹⁸ Otsitsi, abu teyi sulu engyulo nghi eda, ongwu abu dzeɣan onene nɛ kpaa li obabu ba. Odze ngwi abu kwa gbɔ nɛ li otsitsi.>>

¹⁹ Ongyaa na gbɛɛ, <<Ongyukwo, dze ani dafi abu li oyegbɔ mani.

²⁰ Emi otseyi teyi li sunu Imgbasho mi unggwɔ nɛni, nghaduu ema emi iJuda yɔ li gbɛɛ li mi iJerosalin kyemɛ ngwi eyi ka sunu Imgbasho.>>

²¹ IYesu ghatɔ gbɛɛ, <<Ongyaa, nu ani oyeyɛ, onɔ kyema ngwi ema ka wa sunu Otse Imgbasho mi unggwɔ nɛ hona mi iJerosalin kpaa wuba.

²² Ema emi iBatlomi le sunu ungwɔ ngwi ema yon ba; eyi emi iJuda yɔ, eyi le sunu ungwɔ ngwi eyi yon, bana owatɔ-watɔ kye mbi emi iJuda.

²³ Lubana onɔ kyema di li onɔ ma aani, ngwi ali inggise osunu mi otsitsi ka sunu Otson Imgbasho mi onodzi beyi otsitsi kyemɛ, lubana li itɔ ama osunu ngwu Otso Imgbasho le pita ma aali.

²⁴ Imgbasho li Onodzi, ama osunun nu ma sunun mi onodzi beyi otsitsi kyemɛ.>>

25 Ongyaa na gbɛɛ, <<Ani ye Onagbɛ (ongwu a kwun di iKrestu ma) kyɛma. Onɔ ngwi o wa ba yɔ, o ka nu eyi osa mi alungwɔ duu.>>

26 Man iYesu ghatɔ gbɛɛ, <<Li ani ma jo le gbɔdzɛ yi abu aani.>>

Engwafɔ iYesu yɛ wa tun

27 Mi onɔ na mata engwafɔ mgban yɛ man i kwulu ma ewo dafi iYesu le gbɔdzɛ yi ongyaa mani. Nghaduu inggisɛ onyi byita gbɛɛ, <<Li ekyɛ ngwi abu mina naadi kyɔnɛ ngwi abu le kponya yi ongyaa baa?>>

28 Ta ongyaa na dzata ishe eni mgban, yɛ lu igeli ka nya ali inggisɛ duu gbɛɛ,

29 <<Ba na, wa di inggisɛ ngwu nya ani alungwɔ ngwi ani plɛ kyɔ tsatsa nɛni. Li iKrestu ma den hoo?>>

30 A tase mi ogalu kpatɛ ofɛ le lu mbon.

31 Duuse nu ma ba yɔ, engwafɔn tɛkyɛ yan gbɛɛ, <<Otsetse, gye ungwogyɛ.>>

32 Nghaduu iYesu nya ma gbɛɛ, <<Ani sulu ungwogyɛ ongwɛi ema ye ba mani.>>

33 Nɛman engwafɔn tole gbɔ yi ewoma gbɛɛ, <<Naadi inggisɛ oka kye ungwogyɛ wa nun?>>

34 IYesu gbɛɛ, <<Ungwogyɛ mgbi ani, li okyɔ itukwu mgbi Ongwu ndɔ ani esɔ di ngyɛlu idɔ mgban ngwi o wo ani mani.

35 Ema li gbɛɛ, <I sisi ofyia ɛnɛ duuse onɔ oshe ɛto ka gyo baa>? Nin nya ema, kwulu inɛ di okwɔ na! A myɛ gyo oshe-shɛ.

36 Onɛnɛ kpaa a le kpa inggisɛ oshe ɛto mi idɔ mgban, o dile shɛ ɛto mgbi oshishe ogyegwu na

onɛnɛni, ikye ni inggise ofwe eto beyi inggise oshe eto wa dze yi atsa yi ewoma.

³⁷ Nghane elodze ngbɛɛ, <Inggise oka fwe-fwe eto oka di she-she na li otsitsi.>

³⁸ N do ema eso le ka she eto ngwi li ema kya ba. Angbeka teyi kyɔlu ido nsuno mani ta ema tu mgbede mi ido mgbi ama.>>

Emi iBatlomi kwuba noyɛɛ

³⁹ Emi iSamaria kwuba mi igeli na nu iYesu oyɛɛ mi ikye obwendɛ mgbi ongyaa nani, ngwi o gbɛɛ, <<O nya ani alungwo ngwi ani teyi kyɔ tsatsadu.>>

⁴⁰ Nghane ngwi emi iSamaria ba mbon nɛ, a tekye nun gbɛɛ no dze yi ama, man o si lela yi ama egbe efa.

⁴¹ Elodze mgban ogboogbo nu inggise kwuba yɛɛ ama onoyɛɛ.

⁴² A nya ongyaa na gbɛɛ, <<Eyi noyɛɛ mi elodze ngwi abu nya eyi na ta ba, onɛnɛ eyi fwo mi ado ibeyi, eyi di ye gbɛɛ ongyulo nɛ otsitsi-otsitsi o li Onagbe mgbi ese neni.>>

iYesu ngyɛlu ongwe ongyukwiido oka ootse

⁴³ Ngwi egbe efa na nye neta iYesu lu iGalalia.

⁴⁴ (Bana ongwu abuan teyi gbɛɛ oyegbo sulu mmwe mi ese udan ba.)

⁴⁵ Ngwi o kaka iGalalia neman emi iGalalia kyɔn ono. A di ungwɔ ama ngwi o kyɔ mi iJerosalin tsatsa mi oga owe owato-wato mgbi emi Israi nani, ikyekye ama kpaa ke ele.

⁴⁶ O diye ke igeli iKana mi ayese mgbi iGalalia imbe ngwi o kyata eni yee eneekwo nani. Ongbodzi inggise ido mgbi uto oka ongwani la ootse mi ese iKapenahun.

⁴⁷ Ngwi inggise ne fwo gbese iYesu dzata iJudia luba iGalalia ne, o si ke mbon ka tekye nun gbese no ba wa bwe ongwani ongwu ndotse kaka ikwongye nani.

⁴⁸ Ne iYesu nyan gbese, <<Se ni ema di ambe yi ungwu okwulewo bayo ema ka noyeye ba.>>

⁴⁹ Ongbodzi inggise ido mgbi uto na gbese, <<Ongyukwo, ba vla duuse ni ongwani wa kwulu.>>

⁵⁰ IYesu gbese, <<O ka yagba lu, unka ka kyo ongwabu ba.>> Inggise na gbela yi odze ngwi iYesu gbo ne taman o si lu.

⁵¹ Ngwi o kale ke ofe mani engbido mgban wa nyan gbese ewo gbosa lo ongwani.

⁵² O byi ma onw ngwi ewo gbosa lon mani, a gbese, <<Li obyi onyi mi onw ngwi awo dzanta.>>

⁵³ Man otson difwi dafi li onw na yeye ngwi iYesu gbese, <<Ongwabu ka dze oshishe.>> Neta ongwu yi eto mgban duu noyeye.

⁵⁴ Li ambe okwulewo ongwu fan ngwi iYesu kyo mi onw ngwi o dzata iJudia luba iGalalia aani.

5

IYesu ngyelu inggise ootse mi ondu ibu

¹ Onw oka ne, iYesu di yido ke iJerosalin mi oga mgbi emi iJuda.

² Ibu mmala dze ogalu iJerosalin ngwi a li kwun di Onufe Ogalu Mmala ngwi dze yi iwulu opo nghi eda, iyin mi ondu iHibru li iBetesda.

³ Ibyi inggise ama ndotse lato opo ntonani, ama obine, ama ogbikye tukwu ese, beyi ama ngwu alewo kwulu. [

⁴ Ongyeso li kye esho wa kaka eni nani, di kyo akpeni: inggise ongwu ababo nkaka mi onɔ ngwi akpeni le gbo na yɔ, ali ootse mgban duu li ngye.]

⁵ Inggise oka nose ladze mmanani ngwu dotse onova osudiwyo diwyegyata.

⁶ Onɔ ngwi iYesu din ladze mmana di difwi gbɛɛ o dze mi ootse na onɔ ke ne, o byun gbɛɛ, <<I mina abu gbɛɛ ni ootse mgbi abu ngye?>>

⁷ Inggise ootse na si nu uka gbɛɛ, <<Ongyukwo, ani dze yi inggise onyi nka ya ani abo kye ani kaka ibu onɔ ngwi a kyo akpeni ba. Ni ani le fya gbɛɛ nin kaka ta inggise oka li teyi ani.>>

⁸ Ne iYesu nyan gbɛɛ, <<Kyato! Kyi kyelu obutu mgbi abu, kyikye.>>

⁹ Labolabo mata ootse mgban ngye; o kyi kyelu obutu mgban si kyikye.

Mi egbe ngwi ungwɔne kyo ma li egbe otonyewo,

¹⁰ neta emi iJuda ntona nya inggise ngwu a ngyelun ootse na gbɛɛ, <<Li egbe otonyewo; ola fwa gbɛɛ ni abu ka kye obutu mgbi abu ba.>>

¹¹ Nghaduu o nu uka gbɛɛ, <<Inggise ongwu ngyelu ani ootse na nya ani gbɛɛ, <Kyi kyelu obutu mgbi abu kyikye.> >>

¹² Ne a byun gbɛɛ, <<Li ali inggise nya abu gbɛɛ ni abu kyelu obutu mgbi abu kyikye?>>

¹³ Inggise ngwu a ngyelun ootse na ye inggise ma ba, ikyekye iYesu lu dzanta kaka ifu ibyi inggise.

¹⁴ Ono gwee nɛ iYesu wa din mi ozu okwukwo osunu Imgbasho mi iJerosalin si nyan gbɛɛ, <<Dika, abu yɛɛ saan onɛnɛni. Ka kɔɔ alobube wuba di ungwɔ ntimbi nghaabo nɛ wa kɔɔ abu.>>

¹⁵ Inggise na yɛ lu ka nya emi iJuda ntona gbɛɛ li iYesu dzikan ngyɛlu ongwu ootse.

Oshishe ikpewo Ongwɛ

¹⁶ Nghane emi iJuda ntona wita opita iYesu mgbɛkyɛ ngwi o ngyɛlu inggise ootse mi egbe otonyewo.

¹⁷ IYesu si nya ma gbɛɛ, <<Otsani le kyido mgban alono duu, li ngha ngwi ani kpaa le kɔɔ aani.>>

¹⁸ Mi ikye odze nɛ emi iJuda ntonɛ fya mi oglijo mgbi ama duu ongwɔn; ikyegbɛɛ o le mbe ola mgbi egbe otonyewo ta ba, kpaa o dile kwu Imgbasho gbɛɛ Otsongwu, okye ewon yɛɛ ungwonyi yi Imgbasho.

Mfye mgbi Ongwɛ

¹⁹ IYesu nu ma uka sini: <<N nya ema otsitsi, Ongwɛ ka yagba kɔɔ unkonyi abuan ba; o ka kyungwɔ ngwi o di Otson le kɔɔ ma kyoon ta, bana alungwɔ ngwi Otson kɔɔ ma Ongwɛ kpaa li kɔɔ ngha yɛyɛ.

²⁰ Ikyesine Otsongwɛ di Ongwɛ kpan itukwu di tson alungwɔ ngwi Ongwu li kɔɔ duu. Ɛɛn, ikyegbɛɛ no kwulu ema ewo yɔ, ungwɔ ama nngha ongyɛlu inggise nɛ ootse kpaa, Otson ka kye tson.

²¹ Dafi Otson li kyile inggise ikwukwɔ di li kye oshishe nu ma nɛ, li ngha ngwi Ongwɛ kpaa li kye nu ama ngwu ongwu mina okye nu aali.

²² Nghaduukpaa Otsani li gbɔ inggise onyi ikwɔ ba, o yile ikwɔ ogbɔɔgbɔ duu wo Ongwɛ abɔ,

²³ ikyegbɛɛ nu ma kye mmwɛ nu Ongwɛ dafi a li kye nu Otsɔn kpaa yeyɛ mani. Inggise nkye mmwɛ nu Ongwɛ ba Otsɔn ndɔn esɔ ma kpaa o nun mmwɛ ba.

²⁴ <<N nya ema otsitsi, inggise nfwo elodze mgbi ani di nu ongwu ndɔ ani esɔ ma oyeyɛ yɔ, o dze yi oshishe ogyegwu. O dika dzili ba; o fa mi ikwongye luba oshishe.

²⁵ N nya ema otsitsi, onɔ kyema, i di ba kpaa wa ngwi emi ikwukwɔ ka fwo ela mgbi Ongwɛ Imgbasho, ama nfwo ma ka dze oshishe.

²⁶ Dafi Otsɔngwɛ dze yi oshishe abuan nɛ, li ngha ngwi o nu Ongwɛ kpaa dze yi oshishe abuan aali.

²⁷ Nghane o di nun mfye ogbiikwɔ ikyekye o li Ongwɛ Inggise.

²⁸ <<No ka kwulu ema ewo mi ungwɔnɛ ba, ikyena onɔ kyema ngwi ama nlato endzi duu ka fwo ela mgban

²⁹ di tase mi endzi. Ama nkyɔ osuse ka kyato dze oshishe, ama nkyɔ obube ka kyato kaka odzili-dzili.

³⁰ Ani abuen ka yagba kyo unkonyi ba; ani li gbiikwɔ dafi ani fwo ma kyoon, ma ikwɔ mgbi ani li otsitsi, ikyesine ani mina okyungwɔ ongwɛ itukwu ani ba, kpaa itukwu mgbi ongwu ndɔ ani esɔ mani.

Obwende mi odze mgbi iYesu

³¹ <<Ni ani kyo obwende mi odze mgbi ani abuan yɔ, obwende na wuuta ba.

³² Inggise oka dzema nli kyo obwendε mi odze mgbi ani, ma ani ye obwendε mgban li otsitsi.

³³ <<Abu deso ke mbi iJon, o di kyo obwendε mi ikye otsitsi.

³⁴ Li ogbεε Ani mina obwendε mgbi inggise owamyε ba; kpaa Ani gbɔ ntonε ikyegbεε ni ema watɔ.

³⁵ IJon nose dze dafi ipitila nle gbε dile gbosa mani, ema dze yi atsa mi ongwono gwee ikye ogbε osa mgban.

³⁶ <<Ani dze yi obwendε nsundo ngha mgbi iJon nani. Mi ikye ido ngwi Otsani kye nu ani gbεε ni ani ngyelu neni, ngwi ani le kyo nε, i tso obwendε gbεε Otsani do ani eso.

³⁷ Otsani ndo ani eso abuon teyi kyo obwendε mi odze mgbi ani. Ema fwo ela mgban hona di odzεedze mgban ye ba,

³⁸ elodze mgban kpaa wodze mbi ema ba, ikyena ema nu ongwu o don eso nε oyεyε ba.

³⁹ Ema kpayi elodze Imgbasho nε saan ikyekye ema tsewε gbεε li mi ele ngwi ema tu oshishe gyegwu. Ma li elodze Imgbasho ntonε kyo obwendε mi ikye odze mgbi ani,

⁴⁰ nghaduu ema fwa oba mbi ani wa tu oshishe.

⁴¹ <<Ani mina mmwε mgbi inggise owamyε ba,

⁴² kpaa ani ye ema. Ani ye dafi ema dze yi okpitukwu mgbi Imgbasho mi itukwu mgbi ema ba mani.

⁴³ Ani ba mi iyi mgbi Otsani, nghaduu ema gbε ani ba; kpaa ni inggise oka ba mi iyi mgbi ewon yo, ema ka gban.

⁴⁴ Ema ka noyeyɛ sine, ngwi ema le mina mmwɛ mbi ewema, kpaa le pita mmwɛ nkyɛ mbi Imgbasho yuon ta ba?

⁴⁵ <<Nghaduu ka tsɛwɛ gbɛɛ li Ani ka gbe odzɛ wo ema ewo mbi Otsani ba. Li iMose ngwu ema kye itukwu mgbi ema byi mbon na ka gbe odzɛ wo ema ewo aali.

⁴⁶ Ni ema ki nu iMose oyeyɛ yɔ, ema kika nu ani kpaa oyeyɛ, ikyesine o lɔ ungwɔ mi odzɛ mgbi ani.

⁴⁷ Kpaa ngwi ema noyeyɛ mi ungwɔ ngwi o lɔ ba nɛ, ema ka noyeyɛ mi odzɛ ngwi ani gbɔ sine?
>>

6

IYesu byi inggise idubu eda enbwa

¹ Ngwi ungwɔnɛ wa nyɛ nɛ, iYesu fooye lu byulu mi agya Ekyoo Okwukwo mgbi iGalalia (ngwi a di li kwun di ekyoo iTiberia kpaa nani),

² nɛ ibyi inggise kpakpa kyɛdɔn ikyekyɛ a di ambɛ okwulewo ngwi o kyɔ mbi emi ootse mani.

³ Man iYesu tɔ lu unggwɔ ka sisɛ yi emi ong-wafɔɔn.

⁴ Oga owɛ owatɔ-watɔ mgbi emi iJuda dze kwekwe mi onɔ mani.

⁵ Ngwi iYesu kyile inɛ esho di ibyi inggise kpakpa kyɛ le ba mbi ongwu nɛ, o si byi iFyilipi gbɛɛ, <<Li mi ole ngwi eyi ka gya ibredi nu inggise ntonɛ gye?>>

⁶ IYesu byita nɛ ikye ombadun ta, ikyesine o teyi ye mi itukwu mgban unggwɔ ngwi ongwu ka kyɔ.

⁷ iFyilipi nun uka gbɛɛ, <<Udza okpa idɔ mgbi ofyia egyata kpaa ka mɛ ogya ibredi nu ma tsan aba kpatɛ ba!>>

8 Ongwafɔ mgbi iYesu oka, Andru, ongwunɔ iSaimɔn iPyita si gbɛɛ,

9 <<Ongwongyulɔ dze mmeneni ngwu dze yi ibredi ngwi a kyɔ mi ibale nghi eda bɛyi ongwɛ abatsa efa, ntonɛ ka to ole mbi ibyi inggise ntonɛ? >>

10 IYesu si gbɛɛ, <<Ni inggise ntonɛ sise.>> Oshɛ kyinda mi imbe na kpakpa man inggise ntona sise mi ele, engyulɔ mɛ dafi idubu eda sini.

11 IYesu si kyelu ibredi kye angba nu Imgbasho man kye nu engwafɔ mgban nu ma kye gha inggise ntonani, o di kyɔ ngha yi mmbweni yeyɛ, ama duu gye dafi a mina mani.

12 Ngwi inggise duu tu gye gyɔlo ma nɛ, o si nya engwafɔɔn gbɛɛ, <<Kyɔ salu ambulu nsisi ma kwakye mbonyi ni unkonyi ka nyanya ba na.>>

13 A si kye salu ambulu ibredi ibale nghi eda ngwi a gye sisi ma mbwo uya nghi iwyodefa.

14 Dafi inggise ntona di ambe okwulewo ngwi iYesu kyɔ nɛ, a gbɛɛ, <<Mi otsitsi yɔ, nɛnɛ li oyegbo nwogyɔ gbɛɛ o ka ba ɛsɛ mani.>>

15 Ngwi iYesu di gbɛɛ, a wewo ogye ongwu uto mi abumfye nɛ, o wulɛ lu unggwɔ ka dze yuon.

IYesu kyikye mi ikye eni

16 Mi onɔde nani, engwafɔɔn kɛ uto,

17 a kaka uwaa le fooye lu iKapenahun dafi imbe yifu wa, kpaa iYesu ba wa tu ma waba.

18 Awo wa le fa fyumfye, dile gbe akpeni.

19 Dafi a fa uwaa kɛ mɛ imai eta naadi eta dɔ itsitsi nɛ, a di iYesu kyikye mi ikye eni le ba kwɛkwɛ yi ama, ta imio wo ma.

20 Nghaduu o nya ma gbɛɛ, <<Li Ani, ka mio ba na.>>

21 Nɛ a mina okyon kaka uwaa, ntunto neta uwaa to ondu esɛ mi imbe ngwi a le kɛ mani.

22 Tegblifan ibyi inggise ama nto oye uto agya oka nɛ difwi gbɛɛ li uwaa onyi ta bɛdzɛ mmana edɛdɛ ma iYesu edɛdɛ kaka yi engwafɔɔn ba, a lu yuoma.

23 Nɛ uwaa angbeka kye iTiberia wa bɛsɛ kwɛkwɛ yi imbe ngwi inggise ntona gye ibredi mi onɔ ngwi Otse iYesu nose kye angba nu Imgbasho nani.

24 Ngwi ibyi inggise ntona di gbɛɛ, iYesu naadi engwafɔ mgban to mmana wuba nɛ, a kaka uwaa ntona lu oyombo iKapenahun oka pitan.

IYesu ungwogyɛ mgbi oshishe

25 Ngwi a tun mi oyombo uto nɛ, a byun gbɛɛ, <<Otsetse, li alonɔ ngwi abu to mmɛnɛ?>>

26 IYesu nu ma uka gbɛɛ, <<N nya ema otsitsi, ema le pita ani ikyegbɛɛ di ema di ambɛ okwulewo ba, kpaa li ikyegbɛɛ ema gye ungwogyɛ kpakpa tolo.

27 Ka kyidɔ mi ikye ungwogyɛ nli mbe ba, kpaa mi ikye ungwogyɛ nka dze ba oshishe igyegwu ngwi Ongwɛ Inggisɛ ka kye nu ema mani, ikyesinɛ Imgbasho Otson teyi kye ambɛ mgbi ogbela ungwɔ nun.>>

28 Nɛ a byi iYesu gbɛɛ, <<Li alungwɔ ngwi eyi ka kyɔ kyɛmɛ ikye okyidɔ ama ngwi Imgbasho mina?>>

29 IYesu si nu uka gbɛɛ, <<Idɔ mgbi Imgbasho ma li ongwu aani: li onoyɛyɛ mbi ongwu Imgbasho dɔn esɔ nɛni.>>

³⁰ Nghanɛ a byun gbɛɛ, <<Li ali ambɛ okwulewo ngwi abu ka kyɔ ikye ni eyi diye nu abu oyeyɛ? Li alungwɔ ngwi abu ka kyɔ?

³¹ Emi otsikyeyi nose gye imana nkyɛ esho kye, mi okwɛɛ dafi ngwi a tsekise lɔ gbɛɛ: <O kye ungwogye kye esho nu ma gye mani.> >>

³² IYesu nya ma gbɛɛ, <<N nya ema otsitsi, li iMose kye ungwogye nkyɛ esho na nu ema ba, kpaa li Otsani kye ungwogye otsitsi nkyɛ esho na nu ema.

³³ Ikyekye ungwogye mgbi Imgbasho li ongwu nkyɛ esho ba esɛ wa kye oshishe nu esɛ nɛni.>>

³⁴ A gbɛɛ, <<Ongyukwo, le nu eyi ungwogye na alegbe-alegbe.>>

³⁵ Nɛ iYesu nya ma gbɛɛ, <<Li ani li ungwogye mgbi oshishe, inggise nba mbi ani yɔ enbwa ka dɔn wuba, inggise ndi nu ani oyeyɛ yɔ ekweni ka kwun wuba.

³⁶ Kpaa dafi Ani nya ema ma, ema di ani wa, nghaduu ema noyeyɛ ba.

³⁷ Ama ngwu Otsani kye ma nu ani duu a ka ba mbi ani, ali inggise ndi ba mbi Ani duu n ka lɔn onya ba.

³⁸ Ikyena Ani kye esho ba esɛ owa kyɔ owitukwu mgbi ani ba, kpaa okyɔ owitukwu mgbi ongwu ndɔ ani esɔ mani.

³⁹ Ma nɛnɛ li owitukwu mgbi ongwu ndɔ ani esɔ ma aani: gbɛɛ ama ngwu ongwu gbe nu ani duu onyi kpaa no ka byulu mi ele ba, kpaa ni Ani kyile ma esho mi egbe ongwi olɛɛ.

⁴⁰ Lubana owitukwu mgbi Otsani li ogbɛɛ, ali inggise ndi Ongwɛ di nun oyeyɛ ka tu oshishe

gyegwu, Ani dika kyilen mi ikwu mi egbe ongwɪ olɛlɛ mani.>>

⁴¹ Mi ungwɔnɛ emi iJuda wita ondandu mi ikye odzɛ mgbi iYesu ikyekye o gbɛɛ, <<Ani li ungwogyɛ nkyɛ esho ba esɛ.>>

⁴² A gbɛɛ, <<Nɛnɛ li iYesu lo, ongwɛ iJose, ongwu eyi ye otsɔn yi onɔn nɛ baa? Kyɔsinɛ ngwi o ka gbɔ onɛnɛ gbɛɛ, Ani kye esho ba esɛ?>>

⁴³ iYesu nya ma gbɛɛ, <<Nya ondandu yi ewema na.>>

⁴⁴ <<Inggisɛ onyi kpaa ka ba mbi ani ba se Otsani ndɔ ani esɔ ma kwon ba mbi ani, ani dika kyilen mi ikwu mi egbe ongwɪ olɛlɛ mani.

⁴⁵ A teyi lɔ mi afɛ mgbi ama ogbɛɛsɛ gbɛɛ: <Imgbasho ka tso ma tsatsa.> Ali inggisɛ ngaadɔ mbi Otsani di kpayi mbon yɔ ka ba mbi ani.

⁴⁶ Inggisɛ onyi kpaa di Otsani ye ba, li ongwu nkyɛ mbi Imgbasho nɛ ta, li ongwu yuon di Otsɔn aali.

⁴⁷ N nya ema otsitsi, inggisɛ nnoyeyɛ dze yi oshishe gyegwu.

⁴⁸ Ani li ungwogyɛ mgbi oshishe.

⁴⁹ Emi otsikyema gye imana mi imbe okplagada ungwogyɛ nkyɛ esho ba esɛ nani, nghaduu kpaa a kwulu.

⁵⁰ Kpaa ungwogyɛ nkyɛ esho ba esɛ dze mmenɛni, ngwi inggisɛ ka gye di kwulu wuba.

⁵¹ Ani li ungwogyɛ mgbi oshishe nkyɛ esho ba esɛ. Inggisɛ ta ngye ungwogyɛ nɛ o ka dze oshishe gyegwu, ungwogyɛ nɛ li ikpewo mgbi ani ongwu ani ka kye nu mi ikye oshishe mgbi esɛ.>>

⁵² Nɛ emi iJuda ntona wita otangwɛ yi ewoma mi itɔdze ngwi iYesu gbɔ nani, gbɛɛ, <<Kyɔsinɛ

ngwi inggise nɛ ka kye ikpewo mgban nu eyi gye?
>>

⁵³ IYesu nya ma gbɛɛ, <<N nya ema otsitsi se ni ema gye ikpewo mgbi Ongwɛ Inggise di wa eyi mgban bayɔ, ema dɛɛ yi oshishe mbi ema ba.

⁵⁴ Ali inggise ngye ikpewo mgbi ani diyɛ wa eyi mgbi ani dɛɛ yi oshishe igyegwu, ani dika kyilen mi ikwu mi egbe ongwi olɛɛ.

⁵⁵ Ikyesinɛ, ikpewo mgbi ani li ungwogyɛ otsitsi, eyi mgbi ani di li ungwɔ owawa otsitsi.

⁵⁶ Inggise ta ngye ikpewo mgbi ani di wa eyi mgbi ani wodɛɛ mbi ani, ani kpaa wodɛɛ mbon.

⁵⁷ Yɛyɛ dafi Otsani ndɛɛ oshishe dɔ ani esɔ mani, ani di dɛɛ oshishe li ikye Otsani nani, nghanɛ inggise ngye di wa mbi ani yɔ, ka dɛɛ oshishe ikye ani.

⁵⁸ Nɛnɛ li ungwogyɛ nkyɛ esho ba esɛ mani, emi otsikyema gye imana nghaduu a kwulu, kpaa inggise nbyi ewon enbwa yi ungwogyɛ ngwi ani kye nu nɛ, ka dɛɛ oshishe gyegwu.>>

⁵⁹ IYesu gbɔdɛɛ nɛ mi onɔ ngwi o le tsungwɔ mi ozu okwakye mgbi emi iJuda mi iKapenahun mani.

Engwafɔ mgbi iYesu kwuba dzatan

⁶⁰ Ngwi a fwo odɛɛ nɛ nghanɛ, engwafɔ mgbi iYesu kwuba gbɛɛ, <<Otsootso nɛ fyumfye, li emɛ ka gbelan?>>

⁶¹ IYesu ye dafi engwafɔɔn tole ndandu mi odɛɛ nɛni, o si byi ma gbɛɛ, <<Odɛɛ nɛ nu ema ka dzani taa?

⁶² Kini ema di Ongwɛ Inggise yɛ lu esho mi imbe ngwi o teyi dɛɛ ma ema ka gbɔsinɛ?

⁶³ Onodzi mgbi Imgbasho li nu oshishe; mfye mgbi inggise owamyɛ dze yi oyabo ba duudu. Elodze ngwi ani gbo nya ema ntone li onodzi, a di li oshishe kpaa.

⁶⁴ Nghaduu ema angbeka to ma ngwu noyeye ba.>> Ikyesine iYesu teyi ye mi owita-wita ama ngwu noyeye ba mi idzidze ema, yi ongwu nka wa kyen gya mani.

⁶⁵ O kiyayi gbɛɛ, <<Li ungwɔ ngwi ani nya ema gbɛɛ inggise onyi kpaa ka ba mbi ani ba se Otsani nun ofɛ ma aani.>>

⁶⁶ Wita mi onɔ na emi ongwafɔɔn kwuba kyata iyikpa di kyɛɔɔn wuba.

⁶⁷ Nghane iYesu byi engwafɔ mgban iwyodefa ntona gbɛɛ, <<Ema kpaa i mina ema odzata anii?>>

⁶⁸ ISaimon iPyita nu uka gbɛɛ, <<Otse li mbi emɛ eyi ka kɛ? Abu dze yi elodze mgbi oshishe ogyegwu.

⁶⁹ Eyi noyeye di ye gbɛɛ abu li iKrestu, ongwɛ Imgbasho oshishe.>>

⁷⁰ Nɛ iYesu gbɛɛ, <<Ani sadu ema nghi iwyodefa baa? Nghaduu onyi mbi ema li olodu!>>

⁷¹ (O gbɔdze mgbi iJuda ongwɛ Iskarɔti, ikyesine ngwi o li onyi mbi engwafɔɔn nɛ kpaa, o ka wa kye ongwu gya.)

7

Emi ongwunɔ iYesu nun oyeye ba

¹ Ngwi ungwone wa nye nɛ, iYesu kaka iJudia ba kpaa lu le kyikye mi iGalalia, ikyekye ama ogbe emi iJuda teyi le pita ofɛ okyelun oshishe.

² Nghaduu ngwi oga iTabenako mgbi emi iJuda wa dze kwekwe ne,

³ emi ongwunɔ iYesu nyan gbɛɛ, <<I wogyɔ ngwi abu ka dzata imbe ne lu iJudia adzi ni emi ongwafɔ abu nu ma di ungwɔ ama okwulewo ngwi abu li kyɔ ntoneni.

⁴ Inggise nmina gbɛɛ ni inggise yon, li kyungwɔ mi odaada ba. Ngwi abu le kyungwɔ ntonɛ wa ne, kye ewabu tso ni ɛɛ di.>>

⁵ Lubana emi ongwunɔn kpaa nun oyeye ba.

⁶ Ikyenghanɛ iYesu nya ma gbɛɛ, <<Onɔ mgbi ani yeye ma gyo waba; mbi ema yo alonɔ duu le yeye.

⁷ Ɛɛ ka di ema tanyi ba, kpaa ani yo i din tanyi, ikyekye ani kyɔ obwendɛ gbɛɛ ungwɔ ngwi o le kyɔ li ibwubwe.

⁸ Ema ke oga na. Ani le ke oga ne waba ikyekye onɔ mgbi ani yeye ma gyo waba.>>

⁹ Ngwi iYesu gbɔdze ne ne, o tila dze iGalalia.

¹⁰ Nghaduukpaa, ngwi emi ongwunɔn lu oga neman, ongwu kpaa wa ke. O ke mi ododa ba, kpaa mi odaada.

¹¹ Mi oga na ma, emi iJuda tole ndinan dile byita gbɛɛ, <<O ko?>>

¹² Ibyi inggise ntona tole ndandu kpatɛ mi ikye mgbi iYesu, angbeka gbɛɛ, <<O li inggise osuse.>> Angbeka nu uka gbɛɛ, <<Ei o le kpagya inggise wo.>>

¹³ Nghaduu inggise gbɔdze mgban mi ododa ba ikyekye a le mio emi iJuda.

IYesu tsungwɔ mi oga

14 Ono ngwi oga to idzidze ma se, iYesu wa ke ozu okwukwo osunu Imgbasho mi iJerosalin ka wita ungwɔ otsootso.

15 I kwulu emi iJuda ntona ewo man a byita gbɛɛ, <<Kycsine ngwi inggise ne ye ungwɔ kpakpa, ma ngwi inggise onyi kpaa tson ba?>>

16 IYesu nu uka gbɛɛ, <<Otsootso ne li mgbi ani ba. Kye mbi Ongwu ndo ani eso mani.

17 Ali inggise ngwu i minan okyo itukwu mgbi Imgbasho ka fya oye kana otsootso ne kye mbi Imgbasho naadi li mgbi ikyibani.

18 Inggise nli gbɔdze mgbi ibon li kyo ngha ikye otu mmwe mgbi ewon, kpaa inggise nkyido mi ikye mmwe mgbi ongwu ndon eso ma yo li inggise oyeye; atsika onyi dze mi odze mgban ba.

19 IMose nose kye ola nu ema baa? Nghaduu inggise mgbi ema onyonyi kpaa kyo mi ele ba. Kycne ngwi ema le fya ongwɔ ani?>>

20 Inggise ntona gbɛɛ, <<Ese do abu ikye. Li eme le fya ongwɔ abu?>>

21 IYesu nya ma gbɛɛ, <<Ani kyungwo okwulewo onyi kpata, man i kwulu ema duu ewo.

22 Nghaduu, iMose nu ema ola okyiikye (kpaa li mbi iMose ngwi ola na to ba, li mbi emi otsikyema), ema li kye ongwɛ ikye mi egbe otonyewo.

23 Kini a ka kye ongwɛ ikye mi egbe otonyewo ikye ofoola mgbi iMose ba waali, kycsine ngwi ema le kyittinga yi ani gbɛɛ di ani ngyelu inggise ololo ootse mi egbe otonyewo?

24 Ka gbiikwo mi ungwɔ ngwi ema di ma kyoon ba, gbiikwo mi ungwɔ nli emyemye mani.>>

Li iKrestu ma dɛɛn?

²⁵ Mi onɔ na ma inggise angbeka mi iJerosalin wita obyɪ ewoma gbɛɛ, <<Nɛnɛ li ongyulɔ ngwu a le fya ongwɔn ma lo?

²⁶ O dze mmɛnɛ, le gbɔdze mi ododa ma a le kwondu won ba, ama ogbe eyi teyi difwi gbɛɛ o li iKrestu ma waa?

²⁷ Kpaa eyi ye imbe ngwi inggise nɛ tɔkyɛ; onɔ ngwi iKrestu ma wa ba yɔ, inggise onyi ka ye imbe ngwi o tɔkyɛ ba.>>

²⁸ Ta ngwi iYesu kale tso mi ozu okwukwo osunu Imgbasho nɛ, o gbɔ mi ela okwukwo gbɛɛ, <<Ɛɛn, ema ye ani, ema di ye imbe ngwi ani kye mani. Ani dze mmɛnɛ ikyibani ba, ongwu ndɔ ani ɛsɔ ma li otsitsi. Ema yon ba,

²⁹ nghaduu ani yon ikyekye ani kye mbon o di dɔ ani ɛsɔ.>>

³⁰ Nɛ a fya obwan, kpaa inggise onyi yagba okye abɔ gbon ba ikyekye onɔ mgban gyo waba.

³¹ Inggise kwuba mi ifu ibyi kye oyɛyɛ onuunu mgbi ama byi mbon kpɔɔ. A gbɛɛ, <<Ni iKrestu ma wa ba yɔ, o ka kyo ambɛ ama nghao kwulewo ngha inggise nɛɛ?>>

³² Dafi emi iFarasi fwo ibyi inggise tole ndandu mi ungwɔ ntonɛ mi ikpewo iYesu nɛ, engyukwo ama ofifɛ bɛyi emi iFarasi dɔ ama ongyo ozu okwukwo osunu Imgbasho mi iJerosalin gbɛɛ nu ma ka bwa iYesu.

³³ IYesu gbɛɛ, <<Ani ka dze yi ema ongwonɔ gwee ta, man N ka ye lu mbi Ongwu ndɔ ani ɛsɔ mani.

³⁴ Ema ka pita ani, kpaa ema ka tu ani ba; imbe ngwi ani dze kpaa ema ka kɛ gbɛ ba.>>

³⁵ Emi iJuda ntona gbɔ yi ewoma gbɛɛ, <<Li mi ole ngwi inggise nɛ weka olu ngwi eyi ka din ba? O ka lu imbe ngwi emideyi ganya to mi idzidzɛ emi iGriki ma, dika tso emi iGrikii?

³⁶ Oweka mgban sine ngwi o gbɛɛ, <Ema ka pita ani, kpaa ema ka tu ani ba, ma imbe ngwi ani dze ema dika ba gbɛ ba>?>>

³⁷ Mi egbe ongwɔ olɛlɛ beyi egbe ingblimɔ mi oga na ma iYesu dzɛkunto, di gbɔ mi ela okwukwo gbɛɛ, <<Ni ekweni kwu inggise yɔ, non ba wa wa mbi ani.

³⁸ Ali inggise nnu ani oyɛyɛ dafi Afe gbɔ ma, ifogbe mgbi eni oshishe ka fɛ to mbon.>>

³⁹ Mi odzɛ nɛ iYesu kye inɛ byi Onodzi Osaan ngwi ama nnu ongwu oyɛyɛ ka wa gbɛ mani. Nghataa ba onɔ na a kye Onodzi ma nu waba, ikyekye iYesu kaka okwɔkwɔ oshewo mgban ma waba.

⁴⁰ Onɔ ngwi ibyi inggise ntona fwo odzɛ ngwi o gbɔ nɛ angbeka gbɛɛ, <<Otsitsi-otsitsi, inggise nɛ li Oyegbɔ mani.>>

⁴¹ Angbeka gbɛɛ, <<O li iKrestu mani.>>

Angbeka di byita gbɛɛ, <<IKrestu ka to mi iGalalia sine?

⁴² Afe gbɛɛ iKrestu ka to mi etɔ mgbi iDevedi mi iBetlehɛn, ogalu ngwi iDevedi dze bawɛ?>>

⁴³ Itɔdze nɛta inggise ntonɛ si gha ikye iYesu.

⁴⁴ Angbeka mina obwan, nghaduu inggise onyi kye abɔ gbon ewo ba.

*Oyɛyɛ onuunu ba mgbi engyukwo
emi iJuda*

⁴⁵ Ongyɛngye yɔ ama ongyo ozu okwukwo osunu Imgbasho mi iJerosalin yidɔ ke mbi engyukwo ama ofife yi emi iFarasi, a byi ama ongyoongyo ntona gbɛɛ, <<Kyɔnɛ ngwi ema kye iYesu ba mmɛnɛ ba?>>

⁴⁶ Ama ongyoongyo ntona nu uka gbɛɛ, <<Ing-gisɛ onyonyi yama gbɔdzɛ dafi ngwi inggisɛ nɛ gbɔ ye ba.>>

⁴⁷ Emi iFarasi byi ma gbɛɛ, <<Ema tso gbɛɛ, ema kpaa o kpagya ema woo?>>

⁴⁸ <<Ama ogbe inggisɛ teyi hona emi iFarasi onyi nun oyeyɛ yee?

⁴⁹ Ei! Kpaa ibyi inggisɛ ama n ye unkonyi mi ola mgbi iMose ba ntonɛ, ikamba dze ikye ma.>>

⁵⁰ INikodemu, nteyi ke mbi iYesu, di li onyi mboma ma byita gbɛɛ,

⁵¹ <<Ola mgbi eyi noofɛ gbɛɛ ni eyi fwo mbi inggisɛ ba ta ngwɔn ikwɔɔ?>>

⁵² A si nun uka gbɛɛ, <<Abu kpaa kye iGalaliaa? Tsɛwɛ mi ele, ta abu ka difwi gbɛɛ oyegbɔ li tɔ mi iGalalia ba.>>

[
⁵³ Ta ali inggisɛ duu lu ude mgban.]

8

Ongyaa ngwu a bwan mi amah

[¹ Ta iYesu lu Unggwɔ Olivi.

² Tegblifan mi egbegbe ototu nɛ, o diyɛ lu ozu okwukwo osunu Imgbasho mi iJerosalin nani, inggisɛ duu kwakye kpaklili won, man o si sisɛ otso ma.

³ Etsetse mgbi ola mgbi iMose bɛyi emi iFarasi kye ongyaa ngwu a bwan mi amah ba. A non dzekunto mi inɛ ibyi ntona

⁴ si nya iYesu gbɛɛ, <<Otsetse, a bwa ongyaa nɛ le kyɔ amah.

⁵ Mi ola ma iMose nu eyi ofɛ otsɛngwɔ ito ongyaa nɛ mi akwutɛ, ma abu gbɔ dikye?>>

⁶ A tole byun ita nɛ ikye okyan ukya di tu itɔdze okye abɔ byi ele.

Kpaa iYesu klɛɛ wita olɔ ungwɔ mi esɛ mi ongwufabɔ mgban.

⁷ Dafi a kiyayi obyun ita nɛ, o kyile ikye esho si nya ma gbɛɛ, <<Ni inggise onyi mi idzidze ema kyungwɔ obube ye bayɔ, otsungwɔ no li ababɔ otsan ikwutɛ.>>

⁸ O diye klɛɛ wita olɔ ungwɔ mi esɛ.

⁹ Mi odze nɛ, ama nfwo ma wita olu onyonyi, ama nli engyukwo ma teyi, nghataa wa sisi iYesu yi ongyaa na ka kwuzunto mi imbe nani.

¹⁰ IYesu kyile ikye esho byi ongyaa na gbɛɛ, <<Ongyaa, a kɔ? Inggise onyi kpaa sisi onu abu obube wulo?>>

¹¹ O gbɛɛ, <<Onyi kpaa ba, ongyukwo.>>

IYesu si gbɛɛ, <<Ngyɛɛ, ani kpaa nu abu obube ba. Lu kpaa ka kyɔ alobube wuba.>>*]

IYesu li osa mgbi ɛɛ

¹² IYesu di gbɔdze yi inggise ntonɛni, o gbɛɛ, <<Ani li osa mgbi ɛɛ. Ali inggise nkyɛdo ani yɔ o ka yama kyikye mi iifu ba, kpaa o ka dze yi osa mgbi oshishe.>>

* **8:11 8:11** Olɔɔlɔ emi tugbe angbeka sulu ambulu nɛ ba: 7:53--8:11.

¹³ Emi iFarasi si kwun shanye gbɛɛ, <<Abu kwudɛ mmɛnɛ le kyɔ ewabu obwendɛ; obwendɛ mgbi abu wuuta ba.>>

¹⁴ IYesu si nya ma gbɛɛ, <<Ni Ani kyɔ ewani obwendɛ kpaa, obwendɛ mgbi Ani wuuta, ikyekye Ani ye imbe ngwi Ani tɔkyɛ bɛyi imbe ngwi Ani le kɛ mani. Nghaduu ema dɛ yi ozoyeye mi imbe ngwi Ani tɔkyɛ hona le kɛ ba.

¹⁵ Ema li fwikwɔ mi odzɛɛdɛ mgbi inggise owamyɛ; kpaa Ani li fwo inggise onyi ikwɔ ba.

¹⁶ Ma ni ani gbiikwɔ yɔ, ikwɔ ogbɔɔgbɔ mgbi ani ka li ayin, ikyesinɛ ani dɛ yuen ba. Ani dɛ yi Otsani, ongwu ndɔ ani esɔ mani.

¹⁷ Mi ola mgbi ema ma a lɔ gbɛɛ obwendɛ mgbi inggise efa li wuuta.

¹⁸ Ani li ongwu nkyɔ ewani obwendɛ; obwendɛ mgbi ani oka li Otsani, ongwu ndɔ ani esɔ mani.>>

¹⁹ A si byi iYesu gbɛɛ, <<Otsabu kɔ?>>

IYesu nu ma uka gbɛɛ, <<Ema ye ani hona Otsani ba. Ema ki ye ani yɔ, i kika ye Otsani kpaa.>>

²⁰ IYesu gbɔdɛ ntonɛ mi onɔ ngwi o le tsungwɔ mi akangga ozu okwukwo osunu Imgbasho mi iJerosalin kwɛkwɛ yi imbe ngwi a li kye umba woke nani. Nghaduu inggise onyi bwan ba, ikyekye onɔ mgban gyɔ waba.

²¹ Akpe oka nɛ, iYesu di nya ma gbɛɛ, <<Ani le lu, ma ema ka pita ani, i dika kwulu mi alobube mgbi ema. Imbe ngwi ani le lu ma, ema ka yagba kɛ ba.>>

²² Odɛ nɛ nu emi iJuda ntona byita gbɛɛ, <<O ka ngwɔ ewoon? Li ungwɔ ma ngwi o gbɛɛ, <Imbe ngwi ani le lu ma ema ka ba gbɛ ba daa>?>>

²³ Nghaduu iYesu kiyayi gbɛɛ, <<Ema kye mi esɛ; ani kye mi esho. Ema li emi esɛ nɛni; ani li emi esɛ nɛ ba.

²⁴ Ani teyi nya ema gbɛɛ ema ka kwulu mi ali ibwubwe mgbi ema; kini ema noyɛyɛ gbɛɛ ani li ongwu ani gbɛɛ ani dze ma bayɔ, ema ka kwulu otsitsi mi ali ibwubwe mgbi ema.>>

²⁵ A byun gbɛɛ, <<Abu li emɛ?>>

iYesu nu uka gbɛɛ, <<Ani li itɔ inggise ngwu ani teyi nya ema gbɛɛ ani dze mani.

²⁶ Ani dze yi odze kpakpa ofwo ema ikwɔ mi ele. Kpaa ongwu ndɔ ani esɔ ma li otsitsi, odze ngwi ani fwo mbon ma n li kye nya esɛ.>>

²⁷ A yagba difwi gbɛɛ o le nya ma odze mgbi Otsɔn ba.

²⁸ Nghanɛ iYesu nya ma gbɛɛ, <<Onɔ ngwi ema kyile Ongwɛ Inggise desho mata, ema ka ye gbɛɛ Ani li inggise ngwu ani tso gbɛɛ di Ani dze mani. Ani dika kyɔ unkonyi mgbi ikyibani ba kpaa Ani li gbɔ ungwɔ ngwi Otsani tso Ani ma yɛyɛ.

²⁹ Ongwu ndɔ ani esɔ ma dze yi ani; o dzata ani yuen ba, ikyesinɛ Ani li kyungwɔ nli kpan alonɔ duu.>>

³⁰ Ngwi o gbɔ elodze ntonɛnɛ, inggise kwuba nun oyɛyɛ.

Otsitsi ka she abu adi ta

³¹ Mbi emi iJuda ama nnun oyɛyɛ ma, iYesu gbɛɛ, <<Ni ema kwudze mi otsootso mgbi ani yɔ, ema li ama okyɛdɔ ani yɛyɛ.

³² Ema ka ye otsitsi, ta otsitsi ka she ema adi ta.>>

³³ A nun uka gbɛɛ, <<Eyi li etɔ mgbi Abraham, eyi li ofyɛɛ mgbi inggise onyi ye ba. Kyɔsine ngwi abu dika gbɛɛ a ka she eyi adi ta?>>

³⁴ IYesu gbɛɛ, <<N nya ema otsitsi, inggise nle kyo alobube tayo li ofyɛɛ mgbi alobube.

³⁵ Ofyɛɛ dze yi imbe igyegwu mi etɔ ba, kpaa ongwe li mgbi etɔ gyegwu.

³⁶ Nghanɛ ni ongwe she ema adi ta yo, ema ka shɛta otsitsi.

³⁷ Ani ye ema li etɔ mgbi Abraham. Nghaduu ema wewo ongwo ani, ikyekye elodze mgbi ani wodze itukwu mbi ema ba.

³⁸ Ani le nya ema ungwo ngwi ani di mi inai Otsani, ema di li kyungwo ngwi ema fwo mbi otsema mani.>>

³⁹ A nyan gbɛɛ, <<Abraham li otseyi.>>

IYesu gbɛɛ, <<Ni ema ki li emi ongwe Abraham yo, ema kile kyungwo ngwi Abraham kyo mani.

⁴⁰ Ngwi i dze nɛ, ema weka ongwo ani, ikyegbɛɛ ani nya ema otsitsi ngwi ani fwo mbi Imgbasho mani. Abraham kyo ito ungwo ntonɛ ba.

⁴¹ Ema le kyungwo ama ngwi otsema teyi kyon mani.>>

A gbɛɛ, <<Eyi li ofyɛɛ ba. Otsɔ ngwi eyi dzeyan li Imgbasho abuon.>>

Emi ongwe Owape olodu

⁴² IYesu nya ma gbɛɛ, <<Ni Imgbasho ki li Otsema yo, ani kika kpema itukwu, ikyesine ani kye mbi Imgbasho badze mmɛnɛ onɛnɛ aani. Ani ba mgbi ikyibani ba; kpaa li ongwu do ani eso.

⁴³ Kyɔsine ngwi ema le difwi odze ngwi ani le gbo ba? Li ikyegbɛɛ ema le gbela odze ngwi ani le gbo ba mani.

⁴⁴ Ema li mgbi otsema, Olodu, di mina ema okyɔ oweka mgbi otsema. O li inggise ogbɔngwɔ inggise mi owita-wita ma jo, o kwudze mi otsitsi ba, bana otsitsi dze mbon ma ba. Mi onɔ ngwi o mwonya ma, o li gbɔdze mi odzɛɛdze mgban, bana o li inggise omwonya di li otse mgbi onya omwaamwa.

⁴⁵ Nghaduu ikyegbɛɛ ani nya ema otsitsi nɛ, ema nu ani oyeyɛ ba!

⁴⁶ Inggise mgbi ema onyi ka yagba tso abɔ mi obube mgbi ani wɛ? Ni ani le nya ema otsitsi ma, i kyosine ngwi ema nu ani oyeyɛ ba?

⁴⁷ Ongwu nli mgbi Imgbasho li fwon. Itɔdze ngwi ema li fwo ba ma li ikyegbɛɛ ema li mgbi Imgbasho ba.>>

IYesu yi Abrahan

⁴⁸ A byi iYesu gbɛɛ, <<Eyi gbɔ ayin mi ogbɛɛ abu li inggise iSamaria ese di dɔ abu ikye ba naadi?>>

⁴⁹ IYesu gbɛɛ, <<Ese dɔ ani ikye ba, kpaa Ani nu Otsani mmwe nghaduu ema nu ani mmwe ba.

⁵⁰ Ani le pita okwɔkwɔ mi ikye ewen ba; kpaa inggise dzema ngwu pitan, di li ongwu li ongye ogbiikwɔ aali.

⁵¹ N nya ema otsitsi, kini inggise ngyo elodze mgbi ani yɔ, o ka di ikwongye ine ba.>>

⁵² Mi ikye odze nɛ emi iJuda ntonɛ kwulu ela gbɛɛ, <<Onɛnɛ eyi ye gbɛɛ ese dɔ abu ikye otsitsi! Abrahan kwulu, li ngha ngwi ama ogbɛɛɛ kpaa kwulu aali, nghaduu abu gbɛɛ ni inggise ngyo elodze mgbi abu yɔ, o ka di ikwongye ine ba.

⁵³ Abu shewo ngha otseyi Abraham? O kwulu, li ngha ngwi ama ogbɛɛse kpaa kwulu aali. Abu tɛwɛ di abu li emɛ?>>

⁵⁴ IYesu nu uka gbɛɛ, <<Ni Ani nu ewani okwɔkwɔ yɔ, okwɔkwɔ mgbi ani na wuuta ba. Otsani, ongwu ema li gbɛɛ o li Imgbasho mgbi ema na, li ongwu nu ani okwɔkwɔ aali.

⁵⁵ Ema yen ba, kpaa Ani yen. Kini Ani gbɛɛ di Ani yen bayɔ, n ka li inggise omwonya dafi ema mani, nghaduu Ani yen di ngyo elodze mgban.

⁵⁶ Otsema Abraham dze yi atsa mi ewe otsetse odi egbe obaaba mgbi ani; o di egbe na diyɛ dze yi atsa.>>

⁵⁷ Emi iJuda ntona nyan gbɛɛ, <<Abu mɛ onova ngwusefa dɔn iwyo kpaa waba, ta abu di Abraham ye!>>

⁵⁸ IYesu si gbɛɛ, <<Duuse nu ma mba Abraham yɔ, ani plɛ dze!>>

⁵⁹ Mi itɔdze nɛ, a sa akwutse gbɛɛ a ka tsan, kpaa iYesu kye ewon da, wulɛ tase dzata ikpɛsɛ mgbi ozu okwukwo osunu Imgbasho mi iJeros-alin nani.

9

IYesu kwulu inggise nbine kye ifu ine

¹ Dafi iYesu kyikye le ke neta, o di ongyulo ongwu nbine kye ifu.

² Engwafɔɔn byun gbɛɛ, <<Otsetse, li emɛ kyo obube, inggise nɛ naadi ama omban, ngwi a mban bine kye ifu?>>

³ Nɛ iYesu gbɛɛ, <<Li inggise nɛ naadi ama omban kyo obube ba, kpaa ungwɔne kyo ikyegbɛɛ idɔ mgbi Imgbasho no tso ambe mi oshishe mgban.

⁴ Dafi onɔ ka desho nɛ, li kyɛmɛ ngwi eyi ka kyidɔ mgbi Ongwu ndɔ ani esɔ nani. Otu kyɛma, ngwi inggise onyi ka kyidɔ wuba.

⁵ Ngwi Ani ka dɛɛ esɛ nɛ nɛ, Ani li osa mgbi esɛ.>>

⁶ Ngwi o gbɔdze nɛ ngha nɛ, o kyanggwɔ tokɛɛ, o bwili ekyɛ mi anggwɔ si kye gyuwɔ ongyulɔ na inɛ. ⁷ O nyan gbɛɛ, <<Lu, ka ngwunɛ mi uta mgbi iSilon>> (ita iyi nɛ gbɛɛ deesɔ). Nɛta ongyulɔ na lu ka ngwunɛ, si yɛ luba udɛ le dinɛ.

⁸ Ama nwatse udɛ dɔn bɛyi ama nteyi li din le bibɔ ma byita gbɛɛ, <<Nɛnɛ li ongyulɔ nli teyi sɔ le bibɔ nɛ lo?>>

⁹ Angbeka gbɔgbɛɛ, li ongwu.

Angbeka gbɛɛ, <<Ei, o lun luulu ta.>>

Nghaduu ongwu abuon le kali-kali gbɛɛ, <<Li ani ma aani.>>

¹⁰ Nɛ a byita gbɛɛ, <<Kɔsɛnɛ inɛ mgbi abu kwulu?>>

¹¹ O nya ma gbɛɛ, <<Ongyulɔ ngwu a kwun di iYesu na bwili ekyɛ kye gyuwɔ ani inɛ. O nya ani gbɛɛ ni ani lu iSilon ka ngwunɛ. Dafi ani lu ka ngwunɛ netaman, ani si dinɛ.>>

¹² A byun gbɛɛ, <<Inggise ma kɔ?>>

O gbɛɛ, <<Ani ye ba.>>

*Emi iFarasi kya mi odzɛ inɛ
okwulu-kwulu nani*

¹³ A kye ongyulɔ nbɛnɛ na ba mbi emi iFarasi.

¹⁴ Egbe ngwi iYesu bwili ekyɛ kwulu ongyulɔ na inɛ ma, li egbe otonyewo.

¹⁵ Nghane emi iFarasi kpaa di byun ita dafi i kɔ se ngwi inɛ mgban kwulu mani. Inggise na nu

uka gbɛɛ, <<O bwili ekye kye gyuwɔ ani inɛ, ani ka ngwunɛ taman n sile di aani.>>

¹⁶ Emi iFarasi angbeka gbɛɛ, <<Inggisɛ nɛ kye mbi Imgbasho ba, bana o wɛ egbe otonyewo ba.>>

Nghaduu angbeka byita gbɛɛ, <<Kyonɛse inggisɛ alobube ka kyɔ ambɛ okwulewo ngha?>> Ikyenghanɛ a si gheefa.

¹⁷ Mi ongyɛngye ma a diyɛ kyata byi inggisɛ obinɛ na gbɛɛ, <<Abu ma, o gbɔsinɛ ikpewon? Li inɛ mgbi abu ngwi o kwulu.>>

Inggisɛ na nu uka gbɛɛ, <<O li oyegbɔ.>>

¹⁸ Emi iJuda noyɛyɛ gbɛɛ di inggisɛ na teyi binɛ se inɛ wa kwulu lon ba, mbise ngwi a dɛsɔ mbi ama omban.

¹⁹ A byita gbɛɛ, <<Nɛnɛ li ongwɛ emaa? Li ongwu ema gbɛɛ di a mban binɛ kye ifu ma dɛɛn? Kyonɛse ngwi o le di onɛnɛ?>>

²⁰ Ama omban nu uka gbɛɛ, <<Eyi ye o li ongwɛ eyi, eyi di ye o binɛ kye ifu.

²¹ Nghaduu eyi ye dafi i kyɔ se o le dinɛ onɛnɛ ba, naadi eyi ye inggisɛ nkwulun inɛ ba. Byun na. O li ongbɛ wuba; o ka gbɔdzɛ ikye ewon.>>

²² Ama omban gbɔdzɛ nɛ ikyekye a le mio emi iJuda, bana emi iJuda teyi bwalu ondu gbɛɛ inggisɛ ta nnoyɛyɛ gbɛɛ iYesu li iKrestu yɔ, a ka dulun tɔ mi ozu okwakye mgbi emi iJuda.

²³ Li ikyengha ngwi ama omban gbɔgbɛɛ, <<O li ongbɛ wuba; byun na aali.>>

²⁴ Akpe ongwu fan, a kwu inggisɛ nteyi binɛ kye ifu na ela. A gbɛɛ, <<Kye oshewo nu Imgbasho, eyi ye inggisɛ nɛ li inggisɛ alobube.>>

²⁵ O si nu uka gbɛɛ, <<Kini o li inggisɛ alobube hona o li inggisɛ alobube ba kpaa, ani ye ba.

Ungwɔ onyi ngwi ani ye yɔ. Ani teyi bine, kpaa onene ani le di!>>

²⁶ Nghanɛ a byun gbɛɛ, <<O kyɔsine yi abu? O kwulu abu ine sine?>>

²⁷ O gbɛɛ, <<Ani teyi nya ema kpaa ema gadɔ ba. Li alungwɔ mina ema odi fwo? Ema mina oyɛɛ engwafɔɔn naadi?>>

²⁸ Ta a wulun ito di gbɛɛ, <<Abu li ongwafɔ mgbi inggise neni! Eyi yɔ, eyi li engwafɔ mgbi iMose!

²⁹ Eyi ye gbɛɛ Imgbasho gbɔdze yi iMose, kpaa inggise nɛ yɔ, eyi yama ye imbe ngwi o tɔkyɛ kpaa ba.>>

³⁰ Ongyulo na nu uka gbɛɛ, <<Ungwɔnɛ li ungwɔ okwulewo! Dafi ema ye imbe ngwi o tɔkyɛ ba, kpaa o kwulu ani ine neni.

³¹ Eyi ye dafi Imgbasho li fwo odze mgbi emi ali ibwubwe ba mani. O li fwo odze mgbi inggise oyɛɛ ongwu nle kyɔ oweka mgban.

³² Kyɛ onɔ ngwi a ta ɛɛ nghataa ba oneneni, inggise onyi kpaa fwo gbɛɛ a kwulu inggise ongwu nbine kyɛ ifu ine ye ba.

³³ Ongyulo nɛ ki kyɛ mbi Imgbasho bayɔ, o ki kyɔ unkonyi gbɛ ba.>>

³⁴ Mi elodze nɛ a nu uka gbɛɛ, <<A mba abu yi alobube kyɛ ifu; kyɔnɛɛ ngwi abu le tso eyi!>> Man a tsamun tase.

Inɛ obu mi onodzi

³⁵ IYesu si fwo dafi a tsamun tase mani, ngwi o wa tun nɛ, o gbɛɛ, <<Abu noyɛɛ mbi Ongwɛ Inggise joo?>>

³⁶ Ongyulo na byita gbɛɛ, <<O li emɛ, ongyukwo? Nya ani zukwu ni ani wa nun oyɛɛ.>>

³⁷ IYesu si gbɛɛ, <<Onɛnɛ abu din; mi otsitsi, li ongwu nle gbɔdze yi abu nɛni.>>

³⁸ Ongyulo na gbɔgbɛɛ, <<Otɛɛ, ani noyɛyɛ,>> man o sunun.

³⁹ IYesu gbɛɛ, <<Ani ba ɛɛ nɛ ikye ikwɔ ogbɔɔgbɔ, ikyegbɛɛ obinɛ non di, ama ntolɛ di ma nu ma yɛɛ obinɛ.>>

⁴⁰ Emi iFarasi angbeka nto yan ma fwon le gbɔ ngha neta, a byun gbɛɛ, <<Ekyɛgbɔɔ? Eyi kpaa binɛɛ?>>

⁴¹ Nɛ iYesu gbɛɛ, <<Kini ema li obinɛ yɔ, ema ki gye obube mi alobube ba; kpaa onɛnɛ ngwi ema le tso gbɛɛ ema le dinɛ nɛ, alobube mgbi ema ka dze yi ema.

10

Inggisɛ ongyo mmala osuse

¹ <<Mi otsitsi-otsitsi yɔ, n le nya ema, inggisɛ ongwu nkaka mi onufoka mgbi ifatoba mmala ba, kpaa ka tɔ kaka mi ofɛ angbeka yɔ, o li emumyi beyi inggisɛ ofofɛ.

² Nghaduu inggisɛ nkaka mi onufɛ li inggisɛ ongyo mmala.

³ Inggisɛ ongyoongyo li kwulu onufoka, mmala li fwo ela mgban. O li kwu mmala mgban ela mi iyi, di li gbe ma tase.

⁴ Mi onɔ ngwi o gbe ama nli mgban tsatsa tase ma, o li teyi ofɛ, man mmala mgban di li kyɛdɔn, ikyekye a ye ela mgban.

⁵ Kpaa a ka yama kyɛdɔ ingyoga ba; otsitsi, a ka tsinyan ikyesinɛ a yagba difwi ela mgbi ingyoga ba.>>

⁶ IYesu gbɔ itaodze neni, kpaa ungwɔ ngwi o le nya ma gbosa lo ma ba.

⁷ Nghanɛ iYesu diye gbɔgbɛɛ, <<N le nya ema otsitsi, ani li onufoka mgbi mmala.

⁸ Ama nteyi ani ba duu li emumyi bɛyi ama ofofɛ, nghaduu mmala fwo ma ba.

⁹ Ani li onufɛ; ali inggise nkaka nye mbi ani yɔ, o ka watɔ. O ka kaka tase, di tu ungwogye.

¹⁰ Emumyi li ba ikye owa yi di ngwɔ diye dzili; ani ba gbɛɛ nu ma tu oshishe, di tuun dzii.

¹¹ <<Ani li inggise ongyo mmala osuse mani. Inggise ongyo mmala osuse li kye oshishe mgban lase ikye mmala mgban.

¹² Inggise ngwu a kyon idɔ ongyo mmala yɔ, mmala li mgban ba. Nghanɛ onɔ ngwi o di idukwlebe kye le ba ma, o li dzata mmala ntona tsinya lu. Ta idukwlebe li ba wa kwu mmala di ganya ma.

¹³ Inggise na tsinya ikyekye o li inggise ngwu a kyen kyeekye idɔ ta unkonyi won yi mmala ntona ba.

¹⁴ <<Ani li inggise ongyo ifyungwɔ osuse; ani ye mmala mgbi ani, mmala mgbi ani kpaa ye ani.

¹⁵ Dafi Otsani ye Ani, Ani kpaa di ye Otsani mani, Ani di kye oshishe mgbi Ani nu mi ikye mmala.

¹⁶ Ani dze yi mmala angbeka ama nwoto ifatoba yi ama ntonɛ ba. Ama kpaa li kyeme ngwi ani ka gbe ma ba. Ama kpaa ka fwo ela mgbi ani dika yɛɛ obyi ifyungwɔ onyi yi inggise ongyo ifyungwɔ onyi.

17 Itɔdze ngwi Ani kpa Otsani itukwu yɔ, li ikyegbɛ Ani kye oshishe mgbi Ani nu, ikye odi yidɔ kyi kyelu.

18 Inggise onyi kpaa ka yagba gbɛ Ani oshishe ba, Ani ka kye nu abuani. Ani dze yi mfye okye nu di dze yi mfye okyi kyelu. Ola nɛ Ani gbɛ mbi Otsani.>>

19 Mi ikye elodze ntonɛ, emi iJuda di dze yi ogbua-gbua yi ewoma.

20 Ama kwuba gbɛɛ, <<Ese dɔn ikye o dile wede. Kyɔnɛ ngwi eyi le gadɔ mbon?>>

21 Nghaduu angbeka gbɛɛ, <<Elodze ntonɛ li mgbi inggise ngwu ese dɔn ikye ba. Emɛsɛ ka yagba kwulu obinɛ inɛ gbɛɛ?>>

Emi iJuda fwa iYesu

22 Li onɔ oga owɛ-wɛ mgbi okye ozu okwukwo osunu Imgbasho mi iJerosalin dubɔ Imgbasho. Li mi onɔ ofu,

23 nɛ iYesu le kyikye mi akangga ozu okwukwo osunu Imgbasho mi iJerosalin, mi iwulu onufozu mgbi iSolomu nani.

24 Emi iJuda kwakye kpakekɛ won, le gbɛɛ, <<Ka kye onɔ sinɛ ngwi abu kale tsili-tsili eyi ngha? Kini abu li iKrestu ma yɔ, nya eyi mi ododa.>>

25 IYesu gbɛɛ, <<Ani nya ema, kpaa ema noyɛyɛ ba. Ungwɔ ama okwulewo ngwi Ani kyɔ mi iyi mgbi Otsani nɛ, gbɔ odzɛdzɛ mgbi ani,

26 nghaduu ema noyɛyɛ ba ikyekye ema li mmala mgbi ani ba.

27 Mmala mgbi ani li fwo ela mgbi ani; ani ye ma, a di li kyɛdɔ ani.

²⁸ Ani nu ma oshishe gyegwu, a dika dzili wuba; inggise onyi kpaa dika lafwa ma mi abo mgbi ani ba.

²⁹ Otsani, nkye ma do ani ubo ma, shewo ngha ali inggise duu; inggise onyi kpaa ka lafwa ma mi abo mgbi Otsani ba.

³⁰ Ani yi Otsani eyi li onyi.>>

³¹ Emi iJuda di kye akwutse gbɛɛ a ka tsan,

³² nghaduu iYesu gbɛɛ, <<Ani tso ema ungwo okwulewo ama nshewo kwuba mbi Otsani. Li ikye ole mi efu ngwi ema ka tse ani akwutse?>>

³³ Emi iJuda gbɛɛ, <<Eyi le tse abu akwutse mi ikye ungwo ntonɛ onyi kpaa ba, li mi ikye ito ofya Imgbasho, ikyesine abu nli inggise owamyɛ nɛ, le tso gbɛɛ abu li Imgbasho.>>

³⁴ IYesu si nya ma gbɛɛ, <<A lo mi ola mgbi ema gbɛɛ, <Ani gbɛɛ ema li emi imgbasho baa>?

³⁵ Ki non kwu ma di emi imgbasho ma, li mbi ele ngwi elodze Imgbasho ba, ngwi Afɛ ka yagba nyine ba.

³⁶ Ongwu Otsan dudu-dudu dafi li mgban abuan di kye deso ba ɛɛ nɛ mayɛ? Kyɔsine ngwi ema dudu ongwufabo mbi Ani gbɛɛ Ani le fyito ikyekye ani gbɛɛ, <Ani li Ongwe Imgbasho>?

³⁷ Ni Ani le kyido mgbi Otsani bayo, ka nu ani oyeyɛ ba na.

³⁸ Kpaa ni ani le kyɔ yo, ni ema nu ani oyeyɛ ba kpaa, nu ido okwulewo ntona oyeyɛ na, ikye ni ema ye diyɛ difwi dafi Otsani dze mbi ani, ani kpaa di dze mbi Otsani mani.>>

³⁹ A di fya obwan, nghaduu o dzidze to mi abo ma lu.

⁴⁰ Ta iYesu yidɔ foyombo iJodan lu imbe ngwi iJɔn teyi le kyɔ iBatisima ababɔ mani. O ka dzɛkɛ ele.

⁴¹ Inggisɛ di ba mbon kpakpa. A gbɛɛ, <<iJɔn kyɔ ambɛ okwulewo onyi ba, kpaa alungwɔ ngwi iJɔn gbɔ mi ikye ongyulɔ nɛ duu li otsitsi.>>

⁴² Inggisɛ kwuba si nu iYesu oyeyɛ mi imbe nani.

11

Ikwu iLadzaru

¹ Onɛnɛ inggisɛ ngwu a li kwun di iLadzaru dotse. O kyɛ mi iBetani, mi agwɔ mgbi iMeri bɛyi ongwunɔn iMata.

² iMeri nɛ, li ongwu ongwunɔn iLadzaru onɛnɛ ladzɛ esɛ mi ootse aani, di li ongwu kpɔɔ ka wa kye engyie ogbungbɛ kyi iYesu afɔ di kye fɔlu mi otu mgban.

³ Nghanɛ emi ongwunɔn engyaa deeso mbi iYesu gbɛɛ, <<Otɛ, ongwu nkpaabu itukwu na dotse.>>

⁴ Mi onɔ ngwi iYesu fwo ungwɔnɛ mata, o gbɔgbɛɛ, <<Ootse nɛ ka ngyɛ mi ikwongye ba. Ei, li mi ikye okwɔkwɔ mgbi Imgbasho adzi ni Ongwɛ Imgbasho tu okwɔkwɔ mi ele.>>

⁵ iYesu di iMata yi ongwunɔn ongwu ongyaa bɛyi iLadzaru kpan itukwu.

⁶ Nghaduu, ngwi o fwo gbɛɛ iLadzaru dotse nɛ, o diyɛ dzɛ imbe ngwi o dzɛ na egbe efa kpɔɔ.

⁷ Ta o nya engwafɔɔn gbɛɛ, <<Yidɔ kɛ iJudia na.>>

⁸ A gbɛɛ, <<Otsetse, li enggeengga ngwi emi ijuda fya otse abu akwutse, nghanɛ abu diye le kɛ imbe naa?>>

⁹ IYesu gbɛɛ, <<Obyi li iwyodefa mi egbe baa? Inggise nkyikye mi onɔ ka tsiishi ba, ikyekye o li di osa ongwɛ ɛɛ nɛni.

¹⁰ Li mi onɔ ngwi o kyikye mi otu mata ngwi o li tsiishi, ikyekye osa dze ba.>>

¹¹ Ngwi o gbɔdze nɛ nye nɛ, o kiyayi onya ma gbɛɛ, <<Okeyi iLadzarɛ nuna, kpaa n le kɛ ele oka kyilen una.>>

¹² Engwafɔn nu uka gbɛɛ, <<Otse, ki non nuna yɔ, o ka tu iyu.>>

¹³ IYesu le gbɔdze ikwu mgbi iLadzarɛ, kpaa engwafɔn tsɛwe gbɛɛ o le gbɔdze una onana mgbi atta nɛni.

¹⁴ Nɛta o si nya ma mi ododa gbɛɛ, <<iLadzarɛ kwulu,

¹⁵ ma mi ikye mgbi ema yɔ, ani dze yi atsa dafi ngwi ani dze ele ba mani, ikyegbɛɛ ni ema noyeye. Nghaduu i kɛ ka din na.>>

¹⁶ Nɛ iTɔmɔsu (ngwu a li kwun gbɛɛ ongwɛ efa na), nya engwafɔ mgbi iYesu angbeka ntona gbɛɛ, <<Ba ni eyi kpaa kɛ na, adzi ni eyi ka kwulu biyan.>>

IYesu gyila emi ongwunɔn engyaa

¹⁷ IYesu ka kaka, dafi a kye iLadzarɛ ndzi mɛ egbe ɛnɛ wa.

¹⁸ Okyɛɛ mi iJerosalin ba iBetani sisi gwee omɛ imai efa,

¹⁹ emi ijuda kwuba di ba mbi iMata yi iMeri owa gyila ma mi ikwu ongwunɔ ma.

20 Ngwi iMata fwo dafi iYesu kye neta, o tase oka kpatsan, nghaduu iMeri tila dze ude.

21 IMata nya iYesu gbɛɛ, <<Otse, ni abu ki dze mmene ya, ongwunani ki kwulu ba.

22 Nghaduu ani ye gbɛɛ mi onene kpaa Imgbasho ka kya abu alungwa ngwi abu bo duu.>>

23 IYesu si nyan gbɛɛ, <<Ongwunabu ka ye kyee.>>

24 IMata gbɛɛ, <<Ani ye o ka ye kyee mi okyee-kyee mi ikwu mi egbe ongwilele mani.>>

25 IYesu gbɛɛ, <<Ani li okyee-kyee mi ikwu beyi oshishe. Inggise nnu ani oyeye ya, o ka dze oshishe, yeba non kwulu kpaa;

26 ma inggise ta ndze oshishe di nu ani oyeye ka kwulu ba. Abu noyeye mi odze ne we?>>

27 IMata nyan gbɛɛ, <<Een, Otse, ani noyeye gbɛɛ abu li iMedzaya, Ongwe Imgbasho, ongwu nka ba ese ne mani.>>

28 Ngwi o gbodze ne nye mata, o yido kwu ongwunon iMeri ela ke enggenga gbɛɛ, <<Otsetse dze mmeneni, o le pita abu.>>

29 Ngwi iMeri fwo ungwone ne, o kyato vla ke mbi iYesu.

30 Mi ono na iYesu kaka ogalu na waba, kpaa o ka dze imbe ngwi iMata ka tun nani.

31 Ngwi emi iJuda ama nbato yi iMeri mi ude, le gyilan na, di dafi o kyato vla tase neta, a si kyedon, tsewe gbɛɛ o le lu endzi ka tsukwu mi ele.

32 Ngwi iMeri ka to imbe ngwi iYesu dze di din mata, o gbese lanke iyayi di gbɛɛ, <<Otse, ni abu ki dze mmene ya, ongwunani ki kwulu ba.>>

³³ Ngwi iYesu din le tsukwu, yi emi iJuda ama nbato yan ntona kpaa tole tsukwu ne, itukwu mu lon mi onodzi i di kakan ewo.

³⁴ O byita gbɛɛ, <<Ema kyon da mi ole?>>

A gbɛɛ, <<Ba wa di, Otse.>>

³⁵ IYesu tsukwu.

³⁶ Ta emi iJuda gbɔgbɛɛ, <<Di dafi o kpan itukwu maa!>>

³⁷ Nghaduu angbeka mi efu gbɛɛ, <<Ongwu nkwulu obine ine ne kyone ngwi o kyi ndelu ikwu inggise ne wuba?>>

IYesu kyile iLadzaru mi ikwu

³⁸ Dafi itukwu nghao fu-fu lo iYesu ne, o ke endzi. Li endzi olo ngwi a di kye ikwutse tukwu ondufan.

³⁹ O gbɛɛ, <<Mulu ikwutse neni.>>

IMata, ongwu ongwunon kwulu na gbɛɛ, <<Kpaa, Otse, mi onene o ka li odikyi, lubana o la endzi egbe ene waani.>>

⁴⁰ Neta iYesu gbɛɛ, <<Ani teyi nya abu gbɛɛ kini abu noyeye ya, abu ka di okwɔkwɔ mgbi Imgbasho baa?>>

⁴¹ Ta a kyi mulu ikwutse nani. Ne iYesu kyile ine esho, si gbɛɛ, <<Otsani, Ani ta abu angba dafi abu fwo (ibo mgbi) ani wa mani.

⁴² Ani ye dafi abu li fwo (ibo mgbi) Ani alono mani, kpaa n le gbɔdze ne mi ikye abo oyaaya mgbi inggise ama nkwudze to mmene neni, ikye nu ma noyeye gbɛɛ di abu do ani eso.>>

⁴³ Ngwi o gbɔdze ne mata, iYesu kwu ela okwukwo gbɛɛ, <<ILadzaru, tase!>>

⁴⁴ Inggise ikwukwo na si tase, yi ayangwuto ngwi a kye ndiwon afo yi abo, yi ongwi a kye bwan ine mani.

Man iYesu nya ma gbɛɛ, <<Shelun angwuto ikwo na non lu.>>

A wibu ongwo iYesu

⁴⁵ Ne emi iJuda ibyibi ama nba angba ikwu mbi iMeri, di ungwo ngwi iYesu kyo netaman, a nun oyeyɛ.

⁴⁶ Nghaduu angbeka mi efu lu mbi emi iFarasi ka dakwo ungwo ngwi iYesu kyo mani.

⁴⁷ Ne okwukwo inggise ama ofife beyi emi iFarasi kwu ela okwakye mgbi osɔɔsɔ mgbi ama ogbiikwo.

A byita gbɛɛ, <<Li alungwo ngwi eyi ka kyo? Inggise ne le kyo ambɛ ama okwulewo kwuba.

⁴⁸ Kini eyi dzatan le kiyayi ngha yo, ali inggise duu ka wa nun oyeyɛ, nghane emi iRoma ka ba wa kyi gbɛlu imbe mgbi eyi beyi ɛsɛ mgbi eyi kpaa.>>

⁴⁹ Ta onyi mi ifu ma, iyin di iKayafa, ongwu li okwukwo inggise ofife mi onova nani, nya ma gbɛɛ, <<Ema ye unkonyi ba duu!

⁵⁰ Ema yama difwi gbɛɛ i tatase ni inggise onyi kwulu mi ikye ibyi inggise ngha ogbɛɛ ni ɛsɛ mgbi eyi duu dzili ba.>>

⁵¹ Li mi owitukwu mgban ngwi o gbɔdze ne ba, kpaa li dafi o li okwukwo inggise ofife mi onova na mani, o gbo ela oyegbo gbɛɛ iYesu ka kwulu mi ikye ɛsɛ mgbi iJuda duu,

⁵² dika li ikye mgbi ɛsɛ na ta ba kpaa ka li mi ikye engwe mgbi Imgbasho ama nganya ntona mi oyile ma luba mbonyi di nu ma yɛɛ onyi.

⁵³ Nɛ i wita mi egbe na lu iyayi, a wibu ongwɔ iYesu.

⁵⁴ Nghanɛ iYesu di kyikye mi ododa mi idzidzɛ emi iJuda wuba. Kpaa o lu ayɛɛ ndzɛ kwɛkwɛ yi okwɛɛ, mi agwɔ ngwi a li kwun di iFrɛn nani, ka dzɛ efu yi engwafɔɔn.

⁵⁵ Ngwi onɔ oga owɛ owatɔ-watɔ mgbi emi iJuda dzɛ kwɛkwɛ nɛ, inggise kwuba le lu iJerosalin ikye oka fwo ewo duuse ni oga owɛ owatɔ-watɔ wa gyo.

⁵⁶ A kale pita iYesu, dafi a kwudzɛ to mi akangga ozu okwukwo osunu Imgbasho mi iJerosalin nɛ, a le byi ewoma gbɛɛ, <<Ema le tsewe sine? O ka ba Oga nɛ ba naadi?>>

⁵⁷ Nghaduu engyukwo ama ofife bɛyi emi iFarasi teyi noola gbɛɛ kini inggise ye imbe ngwi iYesu dzɛ yo, non gbɔ adzi nu ma ka bwan.

12

A kye engyie kyi iYesu mi iBetani

¹ Ngwi oga owɛ owatɔ-watɔ mgbi emi iJuda sisi egbe egyin nɛ, iYesu si kaka iBetani, imbe ngwi iLadzarɔ ongwu iYesu kyilon mi ikwu dzɛ nani.

² A kyo oga ongwɔ onɔdɛ ikye mmwe mgbi iYesu mi imbe nani. IMata gbe oga nu, iLadzarɔ kpaa sɔdzɛ adinyatse ogye ungwogye yi iYesu.

³ Nɛ iMeri kyi kyelu ikpen engyie ololo ongwɔ fyunfyumnya saan kye tulu kyi iYesu afɔ. Di kyi folu yi otu mgban, man mmgbɛ mgbi engyie na kyi gbɛlu ozu sɔ.

⁴ Kpaa engwafɔ mgbi iYesu onyi, iJuda Iskarɔti ongwu nka wa kyon gya ma byita gbɛɛ,

⁵ <<Kycsinε ngwi a kye engyie nε gya kye awuya na gha emi adze ba? I mε udza okpa idɔ onova olɔɔ.>>

⁶ O gbɔdze nε ikyegbεε di o kye emi adze wuuta ba, kpaa li ikyegbεε o li emumyi; ngwi o li inggise okye ashiko da nε, o li ya ewon abɔ mi ungwɔ ngwi a kye woke ele mani.

⁷ IYesu gbεε, <<Dzanta kε. O kye engyie nε dzeke mi ikye egbe owa ndzi ani.

⁸ Ema ka dze yi emi adze mi idzidze ema alono duu, kpaa ema ka dze yi ani alono ba.>>

⁹ Ibyi inggise emi iJuda difwi gbεε iYesu dze imbe nani man a ba, mi ikyon ta ba kpaa owa di iLadzarɔ, ongwu iYesu kyilon mi ikwongye nani.

¹⁰ Nε engyukwo ama ofife mgbi Imgbasho dze yi oweka okyi ngwɔlu iLadzarɔ kpaa,

¹¹ lubana mi ikye mgbi iLadzarɔ emi iJuda kwuba le dzata engyukwo mgbi ama ye nu iYesu oyεyε.

IYesu kaka mi oglijo

¹² Tegblifan ibyi inggise kpakpa ama nba oga owe owatɔ-watɔ mgbi emi iJuda fwo gbεε iYesu kye ofε dikye le ba iJerosalin nε,

¹³ a gbe abaade tase oka tun, le gbaakwɔ gbεε, <<Osana!

Mse no bε Inggise ngwu ba

mi iyi mgbi Otsε ewo!

Mse no bε Uto mgbi emi Israi ewo!>>

¹⁴ IYesu tu ongwε itaklimyi dɔke ele, dafi a teyi lɔ mi afε gbεε,

¹⁵ <<Ka mio ba na, engwengwengyaa mgbi iDzayɔn;

dii, uto mgbi abu kye aali,

o dɔdɛ ongwe itaklimyi.>>

¹⁶ Mi ababɔ ma engwafɔ mgban difwi ungwɔ ntonɛ ba. Li onɔ ngwi a nu iYesu okwɔkwɔ nyɛ ma se, a kuma difwi gbɛɛ ungwɔ ngwi a kyɔn ntonɛ, Afe ple lo dɛɛ ese ikyon.

¹⁷ Ikyenghanɛ ibyi inggise ama nto yan mi onɔ ngwi o kwu iLadzarɔ elɛ tase mi endzi di kyilon mi ikwu ma, kiyayi okye elodɛ na gbɔfwɛ.

¹⁸ Ikyegbɛɛ inggise kwuba fwo ambe okwulewo ngwi o kyɔ nɛ, a tase oka tun.

¹⁹ Nɛ emi iFarasi gbɔ yi ewoma gbɛɛ, <<Dii, ungwɔnɛ le kye eyi kɛ mbeka ba. Di dafi ese duu kyedɔn mani!>>

IYesu gbɔdɛ ikwu ewon

²⁰ Emi iGriki angbeka kɛ oka sunu mi oga owe owatɔ-watɔ mgbi emi iJuda nani.

²¹ A ba mbi iFyilipi, ongwu kyɛ mi iBetsaida mi iGalalia na, yi imina. A gbɛɛ, <<Ongyukwo, i mina eyi odi iYesu.>>

²² IFyilipi si kɛ ka nya Andru; Andru yi iFyilipi diye lu ka nya iYesu.

²³ IYesu nu uka gbɛɛ, <<Obyi ngwi Ongwe Ing-gise ka gbɛ okwɔkwɔ ma gyo wa.

²⁴ N nya ema otsitsi, ni inenekwu ngwuta lake ese ma ni i bwa bayɔ, ka li inene onyi kpɔɔ; kpaa non bwa yo, ka mba kwuba.

²⁵ Inggise ndi oshishe mgban kpan itukwu yo, oshishe na ka nyanya lon, kpaa ongwu ndi oshishe mgban tan anyi mi ese nɛ yo, ka kyon kaka oshishe ogyegwu.

²⁶ Ali inggise nkyɔ ani idɔ ka kyedɔ ani kyeme; imbe ngwi ani dɛɛ ma, ongbidɔ mgbi ani kpaa ka

dze ele. Otsani ka nu ongwu nli kyo ani ido ma mmwe.

²⁷ <<Onene itukwu mgbi Ani dze mi okakewo, ma li alungwo ngwi ani ka gbo? Nin gbex, <Otsani, dudu Ani to mi obyi nex?> Ei, li mi itodze ne yeye ngwi Ani kaka obyi ne aani.

²⁸ Otsani, kye okwoko nu iyi mgbi abu!>>
Ta ela to mi esho gbex, <<N kye okwoko nu mi ele wa, ma n dika nun okwoko kpo.>>

²⁹ Ibyi inggise ama nto mmana ma fwo ungw na di gbex akpala gbo; angbeka gbex ongyeso gbodze yan.

³⁰ IYesu gbex, <<Ela ne ba mi ikye mgbi ani ba, kpaa li mi ikye oyabo mgbi ema.

³¹ Onene li ono ngwi a ka gbo ese ne ikwo, li onene ngwi a ka lo ongwuuto ongwu ese ne onya to.

³² Nghaduu Ani, ono ngwi a wa kyile Ani esho mi ese ne yo, N ka kwo inggise duu ba mbi ani.>>

³³ O gbo ungwone ikye otso ito ikwu ngwi ongwu ka wa kwu mani.

³⁴ Ibyi inggise gbex, <<Eyi fwo mi Afe gbex iMedzaya ma ka dze gyegwu, ma kyone ngwi abu ka gbex, <A ka kye Ongwe Inggise lu esho kyeme?> Li eme li Ongwe Inggise ne?>>

³⁵ IYesu si nya ma gbex, <<Ema ka wa tu osa mi ongwono mi iyayi. Kyikye mi ono ngwi ema ka dze yi osa neni, duuse ni otu wa to tu ema. Inggise nli kyikye mi iyifu li ye imbe ngwi o le ke ba.

³⁶ Ema noyeye mi osa ngwi ema ka dzeyan neni, ikye ni ema wa yee emi ongwu osa.>> Ngwi o ngyelu odze ogbogbo mata, o si lu ka da.

Emi iJuda fwa onu iYesu oyeye

³⁷ Ambɛ ama okwulewo ngwi iYesu kɔ mi inai ma nɛ kpaa, a nun oyeyɛ ba.

³⁸ Ungwɔnɛ kɔ ikye ombwumbwo elodze mgbi oyegbo Adzaya ngbɛɛ:

<<Otɛ, li emɛ noyeyɛ mi esɔ mgbi eyi,
di li emɛ ngwu mfye mgbi Otɛ
tso tɔ ododa mbon?>>

³⁹ Li mi itɔdze nɛ ngwi a yagba noyeyɛ ba aali, ikyena, dafi Adzaya kpaa gbo mbeka ma gbɛɛ:

⁴⁰ <<O tukwu ma inɛ di nu itukwu mgbi ama tiishu,
nghanɛ a ka di mi inɛ mgbi ama wuba,
naadi difwi mi itukwu mgbi ama ba,
hona k yatitukwu ni ani bwe ma ba.>>

⁴¹ Adzaya gbɔdze nɛ ikyekye o di okwɔkwɔ mgbi iYesu di gbɔdze mi efu.

⁴² Nghaduu mi onɔ na kpɔ angbeka kwuba mi idzidze ama ogbe inggise teyi nun oyeyɛ. Kpaa mi ikye mgbi emi iFarasi a yama gbo oyeyɛ onuunu mgbi ama tase esɛ ba, ikyesinɛ a le mio gbɛɛ a wa dula ma tɔ mi ozu okwakyɛ mgbi emi iJuda.

⁴³ Lubana a mina otɛɛtɛ mgbi inggise nɛgha otɛɛtɛ mgbi Imgbasho.

⁴⁴ IYesu gbo mi elɔ okwukwo gbɛɛ, <<Ni inggise nu ani oyeyɛ yɔ, li ani ta ngwi o noyeyɛ ba, kpaa o nu ongwu ndɔ ani esɔ ma oyeyɛ.

⁴⁵ Inggise ndi ani yɔ, o di ongwu ndɔ ani esɔ mani.

⁴⁶ Ani ba esɛ nɛ dafi osa, ikyegbɛɛ ali inggise ongwu nu ani oyeyɛ yɔ non ka dze mi iifu ba.

⁴⁷ <<Mbi inggise ongwu nfwo elodze mgbi ani kpaa ngyo ma bayɔ, ani gbɔn ikwɔ ba. Bana ani ba owa gbo esɛ ikwɔ ba, kpaa owa dulun tɔ.

⁴⁸ Ikwo dze mi ikye mgbi ongwu nfwani diye gbɛ elodze mgbi ani ba mani; elodze ngwi ani gbo na kpoo ka ngwon ikwo mi egbe ongwi olele.

⁴⁹ Bana ani le gbodze mgbi ikyibani ba, kpaa li Otsani ndo ani eso ma wo ani ola mi ungwɔ ngwi ani ka gbo yi ito ofe ngwi ani dika gbɔn mani.

⁵⁰ Ani ye gbɛe ola mgban li nu oshishe gyegwu. Nghane alungwɔ ngwi ani gbo yo le yeye yi ungwɔ ngwi Otsani nya ani gbɛe ni ani gbo mani.>>

13

IYesu sa engwafoon afo

¹ Duuse nu ma wa gye oga owe owato-wato mgbi emi iJuda. IYesu ye dafi onɔ mgban ngye owa dzata ese ne ye lu mbi Otsɔn. Ngwi ama nli mgban kpan itukwu ka to ese ne ne, o si tso ma okpitukwu mgban ngye kɛkɛ.

² Dafi a so ungwogye ongwi onode neman, Olodu tu iJuda Iskaroti ongwɛ iSaimon wo, owa kye iYesu gya.

³ IYesu ye dafi Otsɔn nun mfyɛ mi alungwɔ duu mani, di ye dafi ongwu kye mbi Imgbasho dile ye lu mbi Imgbasho mani.

⁴ Ne o kyato mi ita ungwogye fwadulu angwuto ongwi ese kye oshata to oshi.

⁵ O kyi mwalu eni woke okye wita le sa emi ongwafoon afo, yile oshata na fwo ma afo.

⁶ O wa to mbi iSaimon iPyita, ongwu nbyun gbɛe, <<Ote, abu ka sa ani afo?>>

⁷ IYesu nu uka gbɛe, <<Onene ema yama ye ungwɔ ngwi ani le kyo ne waba, kpaa ema ka wa ye mi iyayi.>>

⁸ IPyita gbɛɛ, <<Ei, o ka yama sa ani afo ba.>>

IYesu gbɛɛ, <<Kini ani sa abu afo bayo, abu wo ate yi ani ba.>>

⁹ ISaimon iPyita si gbɛɛ, <<Ngyɛse, Otse, no ka li afo ta ba, sa ani abo yi ikye kpaa!>>

¹⁰ IYesu nu uka gbɛɛ, <<Inggise nteyi shuwo yo i wogyo ngwi o ka saafɔ ta; ikyekye ewo mgban duu teyi le saan wa. Ema le saan, kpaa li ema duu ba.>>

¹¹ Bana iYesu ye otsungwon nka wa kye ongwu gya mani, li ngha ngwi o gbɛɛ li ema duu le saan ba aali.

¹² Dafi o sa ma afo ngye ne, o yile angwuto wo ye luba imbe mgban. O si byi ma gbɛɛ, <<Ema difwi ungowo ngwi ani kyo yi ema ne we?>>

¹³ <<Ema li kwu ani gbɛɛ, <Otsetse> yi <Otse> li ayin yeye, li ungowo ngwi ani dze aali.

¹⁴ Onene ngwi ani, Otse yi Otsetse mgbi ema, sa ema afo ne, ema kpaa ka ye sa ewema afo ngha.

¹⁵ N tso ema ambe ngha ikye ni ema kyo dafi ani kyo yi ema neni.

¹⁶ N nya ema otsitsi ongbido yama dze yi os-hewo ngha ongyukwo mgban ba, naadi ongyeso ngha ongwu ndon eso ma ba.

¹⁷ Ngwi ema ye ungowo ntonene onene ne, ema ka tu mse kini ema kyo ma yo.

IYesu ple gbo dafi a ka wa kye ongwu gya mani

¹⁸ <<N yama le gbo yi ema duu ba; n ye ama ani sadu mani. Nghaduu nene li ikye ni ungowo ngwi a lo dze Afe gbɛɛ: Ongwu nkye abo wo uga yi ani ne ka yile iga fyi yen na no mbwumbwo.

19 <<N le nya ema onene duuse no wa kyo, ikyegbæ no wa kyo yo ema ka noyeye mi ito inggise ngwu Ani dze mani.

20 N nya ema otsitsi, ali inggise ngbe inggise ngwu ani don eso tayo gbe ani; ma inggise ta ongwu gbe Ani yo gbe ongwu ndo ani eso mani.>>

21 IYesu gbodze ne ngye man i kakan ewo mi onodzi ta o kyo obwende gbæ, <<N nya ema otsitsi, onyi mbi ema ka wa kye ani gya.>>

22 Engwafon ndine di ewoma, ikye ni ama difwi inggise ngwu o le gbodze na ikyen mani.

23 Oka mi idzidze ma, ongwafon nkpa iYesu itukwu, so don.

24 ISaimon iPyita kyo ongwu nkpa iYesu itukwu na abo gbæ, <<Byun li eme ngwi o le gbodze na yan.>>

25 O kye ewo ge iYesu ke, si byun gbæ, <<Otse li emeni lo?>>

26 IYesu nu uka gbæ, <<Li ongwu ani ka kye anggaye ibredi ne ba kye nun mani.>> Ne, o kye anggaye ibredi na ba, kye nu iJuda Iskaroti, ongwæ iSaimon nani.

27 Ntunto ngwi iJuda kye gbælu ibredi neman, iSatan si kaka mbon.

IYesu nyan gbæ, <<Ungwo nwo abu owa kyo ma, kyon ple-ple tsatso!>>

28 Nghaduu inggise onyi mi ita ungwogye difwi ungwon kyo se ngwi iYesu gbodze ne yan ma ba.

29 Dafi iJuda li uto igbe ne, angbeka tsewe gbæ iYesu le nyan gbæ no ka gya ungwon ngwi ama ka wa kyo aboyaaya ele mi oga owe owato-wato mghi emi iJuda, hona kye ungwon nu emi adze.

³⁰ Labolabo ngwi iJuda kyi gbɛlu ibredi nɛta, o to lu esɛ. Ma li mi otu.

*IYesu gbɔ dafi iPyita ka wa tangwɛ
ongwu mani*

³¹ Ngwi iJuda to lu nɛ, iYesu gbɔgbɛɛ, <<Onɛnɛ Ongwɛ Inggisɛ tu okwɔkwɔ wa, Imgbasho kpaa tu okwɔkwɔ mbon.

³² Kini Imgbasho tu okwɔkwɔ mbon yɔ, Imgbasho ka nu Ongwɛ okwɔkwɔ mbi ewon, dika nu okwɔkwɔ ma akponyi.

³³ <<Engbɛ mgbi ani, ani ka dze yi ema onɔ gblɔgɔdɔ wuba. Ema ka pita ani, dafi n nya emi iJuda ma n dile nya ema onɛnɛ ngha yeyɛ: Imbe ngwi ani le kɛ ma, ema ka ba gbɛ ba.

³⁴ <<Ani le wo ema ola ofufɛ: Kpa ewema itukwu na. Dafi ema kpa ani itukwu nɛ, li ngha ema kpaa ka kpa ewema itukwu aali.

³⁵ Ni ema le kyɔ ngha yɔ inggisɛ duu ka ye gbɛɛ ema li engwafɔ mgbi ani.>>

³⁶ ISaimɔn iPyita byun gbɛɛ, <<Otɛɛ, li mi ole ngwi abu le kɛ?>>

IYesu gbɛɛ, <<Imbe ngwi ani le kɛ ma, ema ka kyɛdɔ onɛnɛ gbɛ ba, nghaduu ema ka wa kyɛdɔ mi onɔ ongwɛ iyayi.>>

³⁷ IPyita byita gbɛɛ, <<Otɛɛ, kyɔsine ngwi ani ka yagba kyɛdɔ abu onɛnɛ gbɛ ba? Ani ka kye oshishe mgbi ani nu mi ikye abu.>>

³⁸ IYesu si gbɛɛ, <<Mi odzimɔ abu ka kye oshishe mgbi abu nu mi ikye anii? N nya abu otsitsi, ogbigbi ka teela waba ta, abu ka tangwɛ ani akpe eta!

14

IYesu kwu engwafɔɔn ewe wo

¹ <<Ka nu itukwu kaka ema ewo ba. Nu Imgbasho oyeye; di nu ani kpaa oyeye na;

² Mi ude Otsen ozu kwuto; ki li ngha bayɔ, n ki nya ema. Ani le lu ele oka yile imbe me ikye ema.

³ Ni Ani ka yile imbe me ikye ema yɔ, n ka ye wa gbe ema ka dze yi Ani adzi imbe ngwi Ani dze ma ema kpaa ka dze.

⁴ Ema ye ofe oke imbe ngwi ani le lu mani.>>

IYesu li ofe oke mbi Otsɔn

⁵ ITɔmɔsu nyan gbɛɛ, <<Otse, eyi ye imbe ngwi abu le ke ba, ma ka kyɔsineɛ eyi ka ye ofe?>>

⁶ IYesu nu uka gbɛɛ, <<Ani li ofe yi otsitsi beyi oshishe. Inggise onyi ka yagba ke mbi Otsani ba se o ka nye mbi ani.

⁷ Ema ki ye ani saan yɔ, ema kika ye Otsani kpaa. Wita onene lu iyayi, ema yon di din waani.>>

⁸ IFyilipi gbɛɛ, <<Otse, tso eyi Otsabu mani ta sika gyɔlo eyi.>>

⁹ IYesu nyan gbɛɛ, <<iFyilipi, ngwi Ani dze yi ema onɔ gblɔgɔɔ ne kpaa abu ye ani lo? Ali inggise ndi ani yɔ li Otsani ma ngwi o di. Kyɔsine ngwi abu gbɛɛ, <Tso eyi Otsani ma>

¹⁰ Abu noyeye dafi Ani dze mbi Otsani, Otsani kpaa di dze mbi ani baa? Elodze ngwi Ani le nya ema ne li mgbi ani abuen ta ba. Kpaa li Otsani ndze mbi ani ma, le kyidɔ mgban aani.

¹¹ Nu Ani oyeye dafi Ani gbɛɛ Ani dze mbi Otsani, Otsani kpaa di dze mbi ani neni; hona ni

i nde sine-sine kpaa ema noyeyɛ mi ambe mgbi ungwɔ okwulewo ntonɛni.

¹² N nya ema otsitsi, ali inggise ndze yi oyeyɛ onuunu mbi ani ka kyungwɔ ama ngwi Ani teyi le kyɔ ntonɛni. O ka kyungwɔ ama nngaha ntonɛ kpaa, ikyekye n le lu mbi Otsani.

¹³ N ka kyɔ alungwɔ ngwi ema bɔ mi iyi mgbi ani duu, adzi ni Ongwe kye okwɔkwɔ nu Otsɔn.

¹⁴ Ema ka yagba bɔ alungwɔ duu mi iyi mgbi ani, n dika kyɔ ema ele.

IYesu zonu Onodzi Osaan

¹⁵ <<Kini ani kpa ema itukwu yɔ, ema ka ngyo ola ngwi Ani wo ema mani.

¹⁶ N dika bɔ Otsani, ta o ka nu ema Ongye okwu ema ewe wo oka, ongwu nka dze yi ema gyegwu mani,

¹⁷ Onodzi mgbi otsitsi nani. Eɛ ka gban ba, ikyekye o yon hona din kpaa ba. Nghaduu ema yon, lubana o dze yi ema dika wo mbi ema kpaa.

¹⁸ N ka dzata ema dafi ongwokwu ba; n ka ye ba mbi ema.

¹⁹ Mi ongwonɔ gwee eɛ ka di ani wuba, kpaa ema yɔ ka di ani. Ikyesine Ani dze oshishe, ema kpaa ka dze oshishe.

²⁰ Mi egbe na ema ka wa difwi dafi ani dze mbi Otsani, ema wo mbi ani, ani di wo mbi ema mani.

²¹ Ali inggise ndze yi ola mgbi ani di li ngyo ma yɔ, li ongwu ani kpan itukwu. Inggise ani kpan itukwu yɔ o ka kpa Otsani itukwu, ani kpaa o dika kpa ani itukwu, n dika kye ewani tson.>>

22 Ta iJuda (li mgbi Iskaroti na ba) gbɛɛ, <<Otse, kyɔsinɛse ngwi abu witukwu okye ewabu tso ɛɛ ba ngwi li eyi ta?>>

23 IYesu nu uka gbɛɛ, <<Kini ani kpa inggise itukwu yɔ, o ka kyɛdo otsootso mgbi ani. O dika kpa Otsani itukwu, eyi dika ba mbon wa dzeyan.

24 Inggise ngwu ani kpan itukwu bayɔ, o ka kyɛdo otsootso mgbi ani ba. Elodze ngwi ema li fwo ntonɛ li mgbi ani ba; a li mgbi Otsani ndo ani eso mani.

25 <<Ani le nya ema ungwɔ ntonɛ duu ngwi ani ka dze yi ema neni.

26 Kpaa Ongye okwewewo, Onodzi Osaan, ngwu Otsani ka kye dɛso mi iyi mgbi ani na, ka tso ema ungwɔ duu diyɛ wɛ ema alungwɔ ama ngwi ani teyi gbɔ nya ema duu.

27 N dzata iyu yi ema; n kye iyu mgbi ani nu ema. N kye nu ema dafi ɛɛ li nu ma ba. Ka nu itukwu sha ema anyɛ ba dika tsimio ba na.

28 <<Ema fwo dafi ani gbɛɛ, <N le lu mbeka n dika yɛ ba mbi ema mani.> Ni ani kpa ema itukwu yɔ, ema ka tsatsa gbɛɛ Ani le lu mbi Otsani, lubana Otsani shewo ngha Ani.

29 N nya ema onɛnɛ duuse no wa kyɔ, ikyegbɛɛ no wa kyɔ yɔ, ni ema noyɛyɛ mani.

30 N ka gbɔdze yi ema gblɔgdɔ wuba, lubana ongwuuto ongwɛ ɛɛ nɛ kyɛma. O dze yi mfye mbi ani ba,

31 kpaa ɛɛ no yɛ kyɛmɛ gbɛɛ Otsani kpa ani itukwu, ani di li kyungwɔ ngwi Otsani wo ani ola ma yɛyɛ.

<<Kyato; ni eyi lu dzata imbe nɛ na.

15

Ekwo eneekwɔ yi abɔn

¹ <<IYesu nya engwafɔɔn gbɛɛ: Ani li ekwo eneekwɔ otsitsi, Otsɛn li inggise ogbinɛbyi ekwo.

² O li kyi dzɛlu ali abɔ ndzɛ mbi ani wa owawa ba ma ngwuta, kpaa o li kye gbɔmbɔ akyikyen mi abɔ ngwi wa owawa mani, ikye no kiyayi owa awawa kwuba.

³ Ema teyi le saan mi ikye elodzɛ ngwi Ani ple gbɔ nya ema nani.

⁴ Kwudzɛ mbi ani na, ta Ani kpaa ka kwudzɛ mbi ema. Abɔ ka yagba wa owawa ikyibɔn ba, sede o ka kwokyi mi iteekwo kyɛmɛ. Ema kpaa ka yagba wa owawa ba sede ni ema kwudzɛ mbi ani.

⁵ Ani li ekwo eneekwɔ ema li abɔ. Kini inggise kwudzɛ mbi ani yɔ, ani kpaa ka kwudzɛ mbon, o ka wa awawa nghaabo ogbugbe; ni li Ani bayɔ ema ka kyɔ unkonyi gbɛ ba.

⁶ Ali inggise nkwudzɛ mbi ani bayɔ, o dzɛ dafi abekwo ngwi a kyi fwɛlu ngwuta non ngwo mani; itɔ abekwo ntona a li sa ma woke ola nu ma gyola.

⁷ Kini ema kwudzɛ mbi ani elodzɛ mgbi ani kpaa di dzɛ mbi ema yɔ, ema ka bɔ alungwo ngwi ema mina duu a ka kye nu ema.

⁸ Ungwɔnɛ li ikye onu Otsani okwɔkwɔ, ogbɛɛ ni ema wa awawa nghaabo ogbugbe, nu ma di difwi gbɛɛ ema li engwafɔ ani.

⁹ Dafi Ani kpa Otsani itukwu nɛ, li ngha ngwi ema kpa ani itukwu aali, onɛnɛ kwudzɛ mi okpitukwu mgbi ani na.

¹⁰ Kini ema ngyo ola mgben yɔ, ema ka kwudɛ mi okpitukwu mgben, dafi ani kpaa ngyo ola mgbi Otsen di kwudɛ mi okpitukwu mgban neni.

¹¹ Ani nya ema ungwɔnɛ ikye ni atsa mgbi ani dɛ mbi ema, adzi ni atsa mgbi ema mbwumbwo.

¹² Ola mgbi Ani ma li ongwu aani: Di ewema kpa eka itukwu dafi ema kpa Ani itukwu neni.

¹³ Inggise onyi dɛ yi okpitukwu ngwi she nɔha ongwunɛ ba, ogbɛɛ inggise kye oshishe mgban lasɛ mi ikye mgbi emi okaan.

¹⁴ Ema li emi okani kini ema ngyo ola ngwi ani wo ema yɔ.

¹⁵ Ani kwu ema gbɛɛ engbido wuba, ikyesinɛ ongbido ye ungwɔ ngwi ongyukwo mgban li kyɔ ba. Nghanɛ, n kwu ema gbɛɛ emi okani, bana alungwɔ ngwi ani kpayi mbi Otsani duu ani nu ema ye.

¹⁶ Li ema dulu Ani ba, kpaa Ani dulu ema di wo ema ido gbɛɛ ni ema lu ka wa owawa nka li gyegwu. Ta Otsani ka nu ema alungwɔ ngwi ema pita mi iyi mgbi ani duu.

¹⁷ Nɛnɛ li ola ngwi ani wo ema: Di eka kpa eka itukwu na.

Ɛsɛ di engwafɔ tanyi

¹⁸ <<Kini ɛsɛ di ema tanyi yɔ, wɛ gbɛɛ i tsekise di ani tanyi.

¹⁹ Kini ema li mgbi ɛsɛ yɔ, ema kika kpan dafi ema li mgban mani. Dafi i dɛ nghanɛ, ema li mgbi ɛsɛ nɛ ba, kpaa ani dulu ema tɔ mi ɛsɛ. Li ikyengha ngwi ɛsɛ di ema tanyi aali.

²⁰ Wɛ odɛ ngwi ani tsekise gbɔ yi ema gbɛɛ: <Ongbido onyi shewo nɔha ongyukwo mgban ba

nani.> Kini a gbɔ ani odzɛ ewo yɔ, a dika gbɔ ema kpaa ngha. Kini a sunu otsootso mgbi ani, a ka sunu otsootso mgbi ema kpaa.

²¹ A ka kyɔ yi ema mi itɔ ofɛ nɛ mi ikye iyi mgbi ani, ikyesine a ye Ongwu ndɔ ani esɔ ma ba.

²² Ni ani ki teyi ba wa gbɔdzɛ yi ama bayɔ, a kika dzɛ yi obube mi alobube mgbi ama ba. Nghaduu onɛnɛ nɛ ema ka yagba natsondu mi obube mgbi ema wuba.

²³ Inggisɛ ongwu ndi ani kyili di Otsani kpaa kyili.

²⁴ Ni ani ki kyɔ mi idzidzɛ mgbi ama ungwɔ ngwi inggisɛ oka teyi kyɔ mi idzidzɛ mgbi ama ye bayɔ, a kika dzɛ yi obube mi alobube mgbi ama ba. Kpaa onɛnɛ a di ungwɔ ama okwulewo ntone duu, nghaduu kpaa a di ani kyili yi Otsani duu.

²⁵ Nghaduu nɛnɛ li ombwumbwo ungwɔ ngwi a lɔ mi Ola mgbi ama gbɛɛ: <A di ani kyili mi itɔdzɛ ba nani.>

²⁶ <<Ni ongye Okwewewo, Onodzi mgbi otsitsi ntɔkyɛ mbi Otsani ongwu ani ka wa dɔn esɔ mbi ema ma, wa ba yɔ, o ka kyɔ obwendɛ mi ikye ani.

²⁷ Li kyɛmɛ ema kpaa ka kyɔ obwendɛ, ikyesine ema dze yi ani kyɛ mi owita-wita.

16

¹ <<Ungwɔ ntone duu Ani tsekise nya ema ikyegbɛɛ ni ema ka boofɛ ba.

² A ka wa dulu ema tɔ mi ozu okwakye mgbi emi iJuda; mi otsitsi, onɔ kyema ngwi ali inggisɛ ngwu ngwɔ ema duu ka tsɛwɛ gbɛɛ ongwu le kyɔ Imgbasho idɔ.

³ A ka kyo ito ungwo ntoneni ikyesine, a ye Otsani hona ani ba.

⁴ Ani tsekise nya ema ungwo ntoneni, ikyegbɛɛ ni onɔ ma wa gyo ema ka we gbɛɛ ani tsekise kwo ema adɔ. Ani nya ema ungwɔnɛ mi ababɔ ma ba, ikyekye ani ka dze yi ema.

Ido mgbi Onodzi Osaan

⁵ <<Onɛnɛ Ani le lu mbi ongwu ndɔ ani esɔ mani, nghaduu onyi mbi ema kpaa byi ani ita gbɛɛ, <Li mi ole ngwi abu le lu baa?>

⁶ Ikyegbɛɛ Ani nya ema ungwo ntonɛ nɛ, ema yɛɛ elela.

⁷ Nghaduu Ani le nya ema otsitsi: Li mi abɔ oyaaya mgbi ema ngwi Ani le lu dze ema ta aani. Sede Ani ka lu dze ema ta bayɔ, Ongye okwɛwɛwo na ka ba mbi ema ba; Kpaa kini Ani lu, Ani ka dɔnsɔ mbi ema.

⁸ Non wa ba yo, o ka fwo esɛ ikwɔ mi ikye alobube yi osaan:

⁹ mi aye mgbi obube yo, li ikyegbɛɛ a nu ani oyɛye ba;

¹⁰ mi aye mgbi osaan yo, li mi ikyegbɛɛ Ani le lu mbi Otsani, mi imbe ngwi ema ka di ani alonɔ-alonɔ wuba;

¹¹ mi aye mgbi ikwɔ ogbɔɔgbɔ yo, li ikyegbɛɛ ongwuuto mgbi esɛ nɛ, a tsekise gbɔn ikwɔ.

¹² <<Ani ka dze yi odze kpakpa ogbɔ yi ema, nghaduu i mbwo nyɛsɛ ngwi ema ka difwi ngyɛ onɛnɛni.

¹³ Kpaa onɔ ngwi ongwu, Onodzi mgbi otsitsi, wa ba yo, o ka ngyo ema kaka ali otsitsi duu. O ka gbɔdze mgbi ikyibɔn ba; o ka gbɔdze ngwi o

fwo ma kyoona ta, o dika nya ema ungwɔ nka kye iyayi mani.

¹⁴ O ka kye okwɔkwɔ ba mbi ani ikyekye o ka kye odze ngwi Ani gbɔ yilen nya ema.

¹⁵ Alungwɔ nli mgbi Otsani li mgbi ani. Li ikyengha ngwi ani gbɛ Onodzi ka todulu mi ungwɔ nli ngwi ani kye nu di nu ema yon aali.

¹⁶ <<Mi ongwono gwee ema ka wa di ani wuba, dika tunto bata ema dika wa di ani.>>

Okakewo mgbi engwafɔ iYesu ka yɛ atsa

¹⁷ Engwafɔ mgbi iYesu angbeka gbɔ yi ewoma gbɛ, <<O kye ine byi sine ngwi o gbɛ, <Mi ongwono gwee ema ka di ani wuba, dika tunto bata ema dika wa di ani,> <Ikyekye ani le lu mbi Otsani?> >>

¹⁸ A kiyayi obyita gbɛ, <<Ongwono gwee ne ma, <tso sine?> Eyi difwi odze ngwi o le gbɔ ne ba.>>

¹⁹ Ngwi iYesu di gbɛ i mina ma obyi ongwu ita mi odze ne ne, o nya ma gbɛ, <<Ema le byi ewema ita mi odze ngwi Ani gbɛ, <Mi ongwono gwee ema ka wa di ani wuba, dika tunto bata ema dika wa di ani ne>>?

²⁰ Ani nya ema otsitsi, ema ka wa tsukwu di kyelela nghaduu ese ka dze yi atsa kwuba. Ema ka wa dze mi okakewo, kpaa okakewo mgbi ema ka wa yɛ atsa.

²¹ Ongyaa nle gblimba li dze yi owulu-wulu kpakpa ikyekye ono imba mgban gyɔ; kpaa mi ono ngwi o mbongwe yɔ, o li gblimɔ yi owulu-wulu nani ikyesine atsa mgban li ogbɛ ongwu mbimba mi ese neni.

²² Li ngha ndze yi ema aani: Onene li onɔ okakewo mgbi ema, kpaa Ani dika ye di ema ta ema ka dze yi atsa, ma inggise onyi kpaa ka gbɛlu ema atsa na ba.

²³ Mi egbe na ema ka byi ani ita ungwɔ onyi kpaa wuba. N nya ema otsitsi, Otsani ka kye alungwɔ ngwi ema bɔ mi iyi mgbi ani duu nu ema.

²⁴ Nghataa ba onene kpaa ema bɔ unkonyi mi iyi mgbi ani waba. Bɔ na ta ema ka gbɛ, man ema ka dze yi atsa kpakpa.

²⁵ <<Nghaduu ani teyi le gbɔdze yi ema mi itaodze, onɔ kyema ngwi ani ka wa gbɔ itɔ on-dudze ne yi ema wuba, kpaa n ka wa nya ema odze mgbi Otsani mi ododa.

²⁶ Mi egbe na ema ka bɔ mi iyi mgbi ani. Ani le gbɛɛ n ka bɔ Otsani mi ikye ema ba.

²⁷ Ei, Otsani abuan di ema kpan itukwu ikyesine Ani kpa ema itukwu ema di noyeye gbɛɛ Ani kye mbi Imgbasho.

²⁸ Ani kye mbi Otsani di wa kaka esɛ neni; onene ani le dzata esɛ ne diye lu mbi Otsani.>>

²⁹ Ta engwafɔ iYesu gbɛɛ, <<Onene abu le gbɔdze yi eyi gbosa di li mi itaodze wuba.

³⁰ Onene eyi di gbɛɛ abu yengye alungwɔ duu di mina gbɛɛ ni inggise onyi kpaa no ka byi abu ita angbeka wuba. Ungwɔne nu eyi noyeye gbɛɛ abu kye mbi Imgbasho.>>

³¹ IYesu nu ma uka gbɛɛ, <<Ema noyeye oneneɛ?

³² Nghaduu onɔ kyema, di li onɔ ma joani, onɔ ngwi a ka ganya ema, ali inggise ka lu ude mgban. Ema ka dzata ani yuen. Kpaa Ani dze yuen ba, lubana Otsani dze yi ani.

³³ <<Ani teyi nya ema ungwo ntonɛ, ikyegbɛɛ ni ema tu iyu ikpewo ani. Mi ɛsɛ nɛ ema ka dɛɛ yi okakewo. Nghaduu bwalu itukwu na! Ani ngha ɛsɛ wa.>>

17

IYesu bibo mi ikye ewon

¹ Dafi iYesu gbodɛ nɛ ngyɛ nɛ, o kyile inɛ esho si bibo gbɛɛ:

<<Otsani, onɔ ma gyo wa. Kye Okwɔkwɔ nu ongwabu, adzi ni Ongwabu kpaa kye okwɔkwɔ nu abu.

² Bana abu teyi kye mfye nun mi ikye mgbi ali inggise duu gbɛɛ no kye oshishe gyegwu nu ama abu kye nun duu.

³ Ma li oshishe gyegwu aani: li onu ma ye abu, Imgbasho otsitsi yuon, bɛyi iYesu iKrestu, ongwu abu dɔn ɛsɔ nɛni.

⁴ Ani kye okwɔkwɔ nu abu mi ɛsɛ mi ongyɛlu idɔ ngwi abu kye nu ani gbɛɛ ni ani kyo mani.

⁵ Ikyenghanɛ, Otsani, nu ani okwɔkwɔ mi inai abu okwɔkwɔ ngwi ani teyi dzɛyan yi abu duuse ɛsɛ wa wita nani.>>

IYesu bibo mi ikye engwafɔɔn

⁶ <<Ani kye abu tso mbi ama abu kye nu ani mi ɛsɛ nɛni. A teyi li mgbi abu; abu kye ma nu ani a di ngyo elodɛ mgbi abu.

⁷ Onɛnɛ a ye gbɛɛ ungwo ngwi Ani dzɛyan duu kye mbi abu.

⁸ Lubana ani kye elodze ngwi abu kye nu ani ma nu ma a di kyi gbelu. A ye saan gbɛɛ ani kye mbi abu, a di noyeye gbɛɛ abu dɔ ani esɔ.

⁹ Ani bibɔ mi ikye ma. Ani le bibɔ mi ikye mgbi esɛ ba, kpaa li mi ikye mgbi ama ngwu abu teyi gbe ma nu ani, ikyesine a li mgbi abu.

¹⁰ Alungwɔ ani dzeyan duu li mgbi abu, alungwɔ abu di dzeyan duu li mgbi ani. Ani di tu okwɔkwɔ ikpewo ma.

¹¹ Ani ka dze esɛ ne wuba, kpaa ama ka to esɛ neni, ani kyema le lu mbi abu. Otsani Osaan, ngwo ma mi mfyɛ mgbi iyi mgbi abu, iyi ngwi abu kye nu ani ikye nu ma yeɛ onyi dafi eyi kpaa li onyi neni.

¹² Mi onɔ ngwi ani ka dze yi ama ma, ani ngwo ma di kye ma dze saan mi iyi ngwi abu kye nu ani. Onyi kpaa byulu ba sede li onyi ongwu dze mi ikye odzili-dzili, ikyegbɛɛ ni elodze mgbi Afe mbwumbwo nani.>>

¹³ <<Ani kyema le ba mbi abu oneneni, ng-haduu ani gbɔ ungwɔ ntonɛ ngwi ani ka dze esɛ neni, ikyegbɛɛ nu ma tu atsa kpakpa dafi ani kpaa tu neni.

¹⁴ Ani teyi kye elodze mgbi abu nu ma wa, kpaa esɛ di ma kyili, ikyekye a li mgbi esɛ ne wuba dafi ani kpaa li mgbi esɛ ne ba neni.

¹⁵ Ibɔ mgbi ani li ikyegbɛɛ ni abu kye gbelu ma mi esɛ ne ba, kpaa li ikyegbɛɛ ni abu ngwo ma mi abɔ emi obube.

¹⁶ A li mgbi esɛ ne ba, dafi ani kpaa li mgbi esɛ ne ba neni.

¹⁷ Kye ma kyi salu mi otsitsi mgbi abu; elodze mgbi abu li otsitsi.

¹⁸ Dafi abu dɔ ani esɔ ba ɛɛ nɛ nɛ, ani kpaa dɔ ma esɔ mi ɛɛ.

¹⁹ Mi ikye mgbi ama ani kye ewani kyi salu, adzi ni a kyi salu ma saan.>>

IYesu bibɔ ikye ama onoyeye duu

²⁰ <<Ibɔ mgbi ani li ikye ma yuoma ba. Ani bibɔ ikye ama nka wa noyeye mbi ani mi esɔ mgbi ama ogbɔɔgbɔ kpaa,

²¹ gbɛɛ ama duu nu ma wa yɛɛ onyi, Otsani, dafi abu dze mbi ani ngwi ani kpaa dze mbi abu neni. Ni ama kpaa dze mbi eyi ikye ni ɛɛ noyeye gbɛɛ abu dɔ ani esɔ.

²² Ani kye okwɔkwɔ ngwi abu kye nu ani ma nu ma wa, ikyegbɛɛ nu ma li onyi, dafi eyi kpaa li onyi neni:

²³ Ani wo mboma abu di wo mbi ani. Ni a gbe ma duu kwakye yɛɛ ondonyi onu ɛɛ ye gbɛɛ abu dɔ ani esɔ, a di kpa abu itukwu yeye dafi ani kpa abu itukwu neni.>>

²⁴ <<Otsani, ani mina gbɛɛ ama ngwu abu kye nu ani ma nu ma dze yi ani mi imbe ngwi ani dze mani, odi di okwɔkwɔ mgbi ani, okwɔkwɔ ngwi abu kye nu ani ikyesine ani kpa abu itukwu duuse ni abu ta ɛɛ nani.>>

²⁵ <<Otsani Osaan, dafi ɛɛ ye abu ba nɛ kpaa, ani ye abu, ma engwafɔ ntonɛ ye dafi abu dɔ ani esɔ.

²⁶ Ani teyi kye abu tso ma, dika kiyayi ole kye abu tso ikyegbɛɛ okpitukwu mgbi abu mbi ani no dze mboma ani abuen kpaa dika dze mboma.>>

18

A bwa iYesu

¹ Ono ngwi iYesu bibo ngye ne, ongwu yi engwafoon fa ufe mgbi iKidron. Mi oyombo na okwo ekwo dze, a si kaka efu.

² IJuda, nkyon gya na, ye imbe nani, ikyesine iYesu li teyi kwakye mi imbe na alono yi engwafoon.

³ IJuda si ba okwo ekwo nani, o gbe obyi oblakwutse mgbi emi iRoma beyi ama ongyo ozu okwukwo osunu Imgbasho angbeka nkye mbi engyukwo ama ofife beyi emi iFarasi teyi. A gbe ola byi yi okyiika.

⁴ Ngwi iYesu teyi ye alungwo nka wa kyon ne, o tase ka byi ma gbɛɛ, <<Li emɛ ngwi ema le pitan?>>

⁵ A nu uka gbɛɛ, <<IYesu ongwi iNadzareti.>>

IYesu gbɛɛ, <<Li ani ma aani.>> (iJuda ongwu nkyon gya na, kwudze mmana yi ama.)

⁶ Ono ngwi iYesu gbɛɛ, <<Li ani ma aani,>> neta a yeyikpa zudwoke ese.

⁷ O diye byi ma gbɛɛ, <<Li emɛ ngwi ema le pitan?>>

A di gbɛɛ, <<IYesu ongwi iNadzareti.>>

⁸ IYesu gbɛɛ, <<N teyi nya ema gbɛɛ li ani ma aani. Kini ema le pita ani yo, ni inggise ntonɛ lu na.>>

⁹ Ungwone kyo ikyegbɛɛ elodze ngwi o teyi gbo ma no mbwumbwo: <<Ani nu onyi kpaa byulu mi ama ngwu abu gbe nu ani ntonɛ ba.>>

¹⁰ Ne iSaimon iPyita, ongwu ndze yi okwusunkli na, kye ngwalu kye kwodze ado abugye mgbi ongbido mgbi okwukwo inggise ofife. (Ongbido na iyin di iMalku.)

¹¹ Nghaduu iYesu wo iPyita ola gbɛɛ, <<Yile okwusunkli mgbi abu woke ifwɛ. Nin ka wa ibwɛ ngwi Otsani kye nu ani nɛ baa?>>

A kye iYesu kɛ mbi Anna

¹² Obyi oblakwutɛ yi ongyukwo mgbi ama bɛyi ama ongyo ozu okwukwo osunu Imgbasho bwalu iYesu. A bwan adi,

¹³ si kyon kɛ mbi Anna ababɔ, ongwu li otsowa iKayafa, nli okwukwo inggise ofife mi onova na mani.

¹⁴ IKayafa li ongwu teyi wɛ emi iJuda ɛwɛ gbɛɛ i tatase gbɛɛ ni inggise onyi kwulu mi ikye ibyi inggise mani.

IPyita tangwɛ iYesu akpe ongwɛ ababɔ

¹⁵ ISaimon iPyita yi ongwafɔ oka kyɛɔ iYesu. Ikyekye ongwafɔ nɛ okwukwo inggise ofife na yon, nghanɛ o kaka yi iYesu mi idzidzɛ uɔ mgbi okwukwo inggise ofife nani,

¹⁶ kpaa iPyita yɔ kwudzɛ onufoka mi esɛ. Ta ongwafɔ oka, ngwu okwukwo inggise ofife yon na, yɛ wa gbɔdzɛ yi ongwongyaa ndzɛ ondu idɔ mi onufoka, man o kye iPyita kaka idzidzɛ.

¹⁷ Ongwongyaa mi onufɛ na byi iPyita gbɛɛ, <<Abu kpaa li onyi mi engwafɔ mgban lɔ?>>

O gbɛɛ, <<Li Ani ba.>>

¹⁸ Onɔ ma ofu le yi, nɛ engbidɔ bɛyi ama ongyoongyo kwudzɛ kpakekɛ wo ola ngwi a kye wo le wɛ mani. IPyita kpaa kwudzɛ le wola yi ama.

Okwukwo inggise ofife byi iYesu ita

¹⁹ Nghanɛ, okwukwo inggise ofife na byi iYesu ita mi odzɛ mgbi engwafɔn bɛyi otsootso mgban.

²⁰ IYesu nu uka gbɛɛ, <<Ani gbɔdzɛ nya ɛɛ mi ododa, n li tso alonɔ mi ozu okwakye mgbi emi iJuda hona mi ozu okwukwo osunu Imgbasho mi iJerosalin, imbe ngwi emi iJuda duu li kwakye nani. N gbɔdzɛ onyi mi odaada ba.

²¹ Kyɔsinɛse ngwi abu le byi ani ita? Byi ama nfwo ani mani. Otsitsi a ye ungwɔ ngwi ani gbɔ.>>

²² Mi onɔ ngwi iYesu gbɔdzɛ nɛ ma, onyi mbi ama ongyoongyo ndzɛ kwɛkwɛ yan ma tan afɛ mi inɛ. O byita gbɛɛ, <<Li ngha ngwi a li nu okwukwo inggise ofife uka daa?>>

²³ IYesu gbɛɛ, <<Kini ani gbɔ ungwɔ nli ayin bayɔ, tso ani obwendɛ mi ungwɔ nli obube mani. Kpaa kini ani gbɔ otsitsi ma, kyɔnɛ ngwi abu ta ani afɛ?>>

²⁴ Nɛta Anna si kyon desɔ, yi adi mi abɔ, lu mbi iKayafa, okwukwo inggise ofife nani.

*IPyita tangwɛ iYesu akpe ongwu fan
yi ongwu ta*

²⁵ Dafi iSaimon iPyita ka kwudzɛ le wola nɛ, a di byun gbɛɛ, <<Abu li onyi mi engwafɔɔn wɛ?>>

O tangwɛ gbɛɛ, <<Li ani ba.>>

²⁶ Nghaduu onyi mbi ama ongyoongyo mgbi okwukwo inggise ofife na, ongwu nli odo yi ongyulo ngwu iPyita teyi dzan adɔ na, fwa ikwangha yi iPyita gbɛɛ, <<Ani di abu yi iYesu mi okwɔ baa?>>

²⁷ IPyita di tangwɛ, labɔlabɔ nɛta ogbigbi wita oteela.

IPlatu fwo iYesu ikwɔ

²⁸ Ta emi iJuda kyelu iYesu mbi iKayafa lu opiikwɔ mgbi iGɔna inggise iRoma. Onɔ na li

egbegbe ototu, mi ikye ofwa idza owa ndelu ma oga owe owato-wato mgbi emi iJuda ne, emi iJuda fwa okaka ude iGona.

²⁹ IPlatu tase ke mboma ka byita gbɛɛ, <<Li ali itodze ngwi ema kye le ba mi ikpewo ongyulo ne?>>

³⁰ A nu uka gbɛɛ, <<Inggise ne ki kyungwo obube bayo, eyi ki kyon ba mbi abu ba.>>

³¹ IPlatu gbogbɛɛ, <<Nghane kyon abuema ka gbɔn ikwo mi ola mgbi ema na.>>

Emi iJuda fwa gbɛɛ, <<Ola nu eyi ofe ongwɔ inggise ba.>>

³² Ungwɔne kyo ikyegbɛɛ odze ngwi iYesu teyi gbɔ mi ito ikwu ngwi ongwu ka wa kwu ma no mbwumbwo.

³³ IPlatu si ye kaka ifoozu, kwu iYesu ela ba di byun gbɛɛ, <<Abu li uto mgbi emi iJudaa?>>

³⁴ IYesu byun gbɛɛ, <<Li ewe otseetse mgbi abu naadi inggise angbeka nya abu odze mi ikye ani?>>

³⁵ IPlatu gbɛɛ, <<Ani li emi iJudaa? Li emidabu yi engyukwo ama ofife mgbi abu kye abu ba mbi ani aani. Li alungwo abu kyo?>>

³⁶ IYesu gbɛɛ, <<Esuto mgbi ani li ongwi ese ne ba. Ki li ongwi ese ne yo, engbidɔ mgben kika gblika ikye otukwu ofe onu emi iJuda bwa ani. Nghaduu esuto mgbi ani dze mbeka.>>

³⁷ IPlatu gbɛɛ, <<Ngyese, abu li uto!>>

IYesu nu uka gbɛɛ, <<O gbɔ ayin ogbɛɛ di ani li uto. Mi otsitsi yo, li itodze ne ngwi a mba ani, di li itodze ne ngwi ani ba ese neni, ikye okyo obwende mi otsitsi nani. Ali inggise ndze mi agya mgbi otsitsi yo li fwo ani.>>

³⁸ IPlatu byita gbɛɛ, <<Li alungwɔ li otsitsi?>> Mi odzɛ nɛ o di tase kɛ mbi emi iJuda ka gbɔgbɛɛ, <<N tun yi obube ba.

³⁹ Ema dze yi aletɔ mgbi ema onu ani dulu inggise onyi mi obawi mi onɔ oga owe owatɔ-watɔ mgbi emi iJuda nu ema. Ema mina gbɛɛ ni ani dulu uto mgbi emi iJudaa?>>

⁴⁰ Nghaduu a wulu ela gbɛɛ, <<Ei, no ka li ongwu ba! Kye iBaraba nu eyi!>> Onɔ na iBaraba wo abɔ mi ablodze.

19

A ngwɔ iYesu ikwɔ owa gbokwon

¹ Ta iPlatu woola nu ma gbo iYesu onitse.

² Ama oblakwutse ndi akata ato kye tukwun ikye. A kye awulu omuma shinishini kye won

³ diyɛ kɛ mbon dudɔ-dudɔ, gbɛɛ, <<Eyi ta abu angba, uto mgbi emi iJuda!>> A dile tukwun afɛ mi ine.

⁴ IPlatu di tase ba ese wa gbɔ yi emi iJuda gbɛɛ, <<Dii, ani kyon le ba ese mbi ema ni ema ye gbɛɛ ani tun yi obube mi elikwɔ ngwi ema kwun nɛ ba.>>

⁵ Ngwi iYesu tase ba ese yi akata ato mi ikye beyi awulu omuma shinishini mi ewo nɛ, iPlatu nya ma gbɛɛ, <<Ongyulɔ ma dze na!>>

⁶ Plɛ ngwi engyukwo ama ofife beyi ama ongyoongyo mgbi ama din nɛ, a wulu gbɛɛ, <<Gbokwon mi ekwatsi! Gbokwon mi ekwatsi!>>

Nghaduu iPlatu gbɛɛ, <<Ema kyon ka gbokwo mi ekwatsi abuema na. Mbi ani yɔ, ani tu itɔdze mi elikwɔ mgban ba.>>

⁷ Emi iJuda biibe gbɛɛ, <<Eyi dze yi ola, ma mi ola mgbi eyi mayɔ, o ka kwulu kyeme, ikyena o kye ewon gbɛɛ ongwu li Ongwɛ Imgbasho.>>

⁸ Ngwi iPlatu fwo ungwɔnɛ nɛ, i nghao kwulun ewo,

⁹ ta o diye kaka ifyude. O byi iYesu gbɛɛ, <<Abu kye mi ole?>> Nghaduu iYesu kwondu won ba.

¹⁰ IPlatu gbɛɛ, <<Abu fwa ogbɔdze yi anii? Abu difwi gbɛɛ ani dze yi mfye odzata abu hona gbokwo abu mi ekwatsi baa?>>

¹¹ IYesu gbɛɛ, <<Abu kika dze yi mfye mi ikye ani ba, ni a ki kye nu abu kye esho bayɔ. Nghaduukpaa ongwu nkye ani nu mi abɔ mgbi ema na, nghao kyɔ obube duu.>>

¹² Wita mi onɔ na lu iyayi, iPlatu fya odzata iYesu, kpaa emi iJuda kiyayi owulu gbɛɛ, <<Kini abu dzata ongyulɔ nɛ lu yɔ, abu li oka iSidza wuba. Ali inggise nkye ewon gbɛɛ ongwu li uto duu kye iga le fyese yi iSidza.>>

¹³ Ngwi iPlatu fwo odze nɛ nɛ, o ka kye iYesu luba ese man sɔke itse ogbiikwɔ mi imbe ngwi a li kwun di Ikwutse (ngwi a li kwun mi ondudze Aramai gbɛɛ iGabata nani).

¹⁴ Li mi egbe owewo mgbi oga owe owatɔ-watɔ mgbi emi iJuda, di li mi onɔ idzizude.

Nɛ iPlatu nya emi iJuda gbɛɛ, <<Uto mgbi ema dzana.>>

¹⁵ Nghaduu a wulu gbɛɛ, <<Kyon lu mmeneni! Kyon lu mmeneni! Gbokwon ngwɔn!>>

Ta iPlatu byita gbɛɛ, <<Nin gbokwo uto mgbi ema mi ekwatsii?>>

Engyukwo ama ofife gbɛɛ, <<Eyi dze yi uto oka ba li iSidza yuon.>>

¹⁶ Mi ongyɛngye duu iPlatu kyon nu ma gbɛɛ nu ma ka gbokwon mi ekwatsi.

A gbokwo iYesu

Man ama oblakwutɛ kye iYesu lu.

¹⁷ Ngwi o kye ekwatsi mgban nɛ, o lu imbe idingbo (ngwi a li kwun mi ondudɛ Aramai di iGogota nani).

¹⁸ Mi imbe nɛ a gbokwon yi inggise efa, oka mi abugye yi oka mi abubɛ, iYesu wo idzidɛ.

¹⁹ IPlatu nu ma lo ungwɔ kye bɛɛ mi ekwatsi. I gbɔgbɛɛ: IYESU ONGWI INADZARETI, UTɔ MGBI EMI IJUDA.

²⁰ Emi iJuda kwuba gbɔ ambɛ nɛni, bana imbe ngwi a gbokwo iYesu ma dɛ kwɛkwɛ yi igeli okwukwo, ambɛ na a lon mi ondu Aramai, iLatin yi iGriki.

²¹ Engyukwo ama ofife mgbi emi iJuda fwa yi iPlatu gbɛɛ, <<Ka lo gbɛɛ, <Utɔ mgbi emi iJuda ba,> kpaa gbɛɛ ongyulo nɛ li kye ewon gbɛɛ ongwu li utɔ mgbi emi iJuda.>>

²² IPlatu gbɛɛ, <<Ungwɔ ngwi ani lo yɔ, ani lo setawaali.>>

²³ Ono ngwi ama oblakwutɛ gbokwo iYesu mi ekwatsi ngyɛ nɛ, a kyi gbelu angwuto mgban, kyi ghalu imbe enɛ, onyi mi ikye mgbi ali inggise mgbi ama, i sisi awulu mgban. Angwuto nɛ dɛ yi okwokiikwokyi ba, li ungwonyi kye esho lu esɛ.

²⁴ Ama oblakwutɛ ntona gbɔ yi ewoma gbɛɛ, <<Eyi ka fawa angwuto nɛ ba, eyi ka gbo efa mi ele ni eyi ye inggise nka li mgban.>>

Ungwɔnɛ kyo ikye ombwumbwo ungwɔ ntsekise dɛ mi Afɛ gbɛɛ,

<<A kye ghalu angwuto
mgbi ani nu ewoma
di gbo efa mi abu mgbi ani.>>

Li ungwo ngwi ama oblakwutse kyo aani.

²⁵ Ono iYesu kwudze kwekwe yi ekwatsi mgbi iYesu yi oshanon, yi iMeri owa iKlopa, beyi iMeri iMagidalin.

²⁶ Dafi iYesu di onon mi imbe na, yi ongwafoon ngwu kpan itukwu kwudze yan ne, iYesu nya onon gbex, <<Ongyaa ongwabu dzana,>>

²⁷ o diye gbo yi ongwafoon na gbex, <<Onabu dzana.>> Wita mi ono na nghataa lu iyayi, ongwafoon na kye iMeri lu ude mgban.

Ikwu iYesu

²⁸ Ono gwee ne, iYesu ye dafi alungwo duu ngye, ma ikyegbex ni ungwo ndze mi Afe mbwumbwo yo, O gbex, <<ekweni kwin.>>

²⁹ Mi imbe na atankpe enee kwa ofyunfyummya ba dze ele, nghanne a kye isoso tswoke ele, kye fake anggekwa ihiso, kyilen be iYesu ke ikpondu.

³⁰ Ngwi iYesu wa duu ne, o gbex, <<I ngye wa.>> Ta, o kye onbukwa ngwuta si yulu.

³¹ Ungwone kyo mi obwi, tegblifan li egbe otonyewo mgbi emi iJuda. Ikyegbex emi iJuda mina gbex ni ikwa ntona fato ekwatsi mi egbe otonyewo ba ne, a ka bo iPlatu ofe gbex nu ma gbikye ma afo di tashulu ikwa ntonani.

³² Ama oblakwutse ba wa gbikye afo efa mgbi inggise ongwu ababo ngwu a kyon gbokwo mi ekwatsi yi iYesu dika gbikye mgbi oka nani.

³³ Nghaduu ngwi a ba mbi iYesu ma, a difwi dafi o teyi kwulu wa nɛ, a gbikyen afo wuba.

³⁴ Neta, inggise oblakwutse oka kye okpa kwo iYesu mi esa, ta eyi yi eni fe lon mi esa.

³⁵ Inggise ndi ma kyo obwendɛ, obwendɛ mgban li otsitsi. O ye gbɛɛ ongwu gbo otsitsi, di kyo obwendɛ ikyegbɛɛ ni ema kpaa ki noyeye.

³⁶ Ungwo ntone kyo adzi ni ondu odzɛɛdze ngwi Afe dze gbɛɛ <<Akpukpu mgban onyi kpaa a ka gbikyen ba,>> na no mbwumbwo.

³⁷ Dafi Afe oka di gbɛɛ, <<A ka di ongwu a kwon okpa nani.>>

A ndzi iYesu

³⁸ Ono gwee nɛ, iJose ongwi Arimatia wa bo iPlatu ikwo mgbi iYesu. IJose kpaa li ongwafɔ mgbi iYesu, o wa bo mi odaada ikyekye o le mio emi iJuda. Dafi iPlatu nun ofɛ nɛ, o wa kyi kyelu ikwo mgbi iYesu lu.

³⁹ O kye beyi iNikodemu, ongyulo nteyi ke mbi iYesu mi otu nani. INikodemu ba yi ungwɔ ama ogbungbe kwuba ngwi a kye bwuo yi ewoma me mlo dafi ngwuseta don iwyo diwyeda sini.

⁴⁰ Ngwi a kyi kyelu ikwo mgbi iYesu nɛ, ama efa kye ikwo na ndi woke angwuto yi ungwɔ ama ogbungbe ntonani. A kyungwone dafi emi iJuda li ndzi inggise mi aletɔ mgbi ama mani.

⁴¹ Imbe ngwi a gbokwo iYesu mi ekwatsi na, li mi okwo, di li mi okwo na ngwi endzi ofufe dze ele, ongwɔ a ndzi inggise mi ele ye waba.

⁴² Ikyegbɛɛ li egbe owewo mgbi emi iJuda mi ikye egbe otonyewo, endzi di dze kwɛkwe nɛ, a kye iYesu ndzi mi ele.

20

Endzi nla ayayi

¹ Egbe Iladi mi egbegbe ototu ne, iMeri iMagidalin ke endzi ka di dafi ikwutse ngwi a kye tukwu ondendzi na a kye mulu. ² Ne o nye yi onya ke mbi iSaimon iPyita beyi ongwafo oka, ongwu nkpa iYesu itukwu nani, ka gbɛɛ, <<A kyi dulu Otse iYesu mi endzi, ma eyi ye imbe ngwi a kyon ka lake ba.>>

³ Ta iPyita yi ongwafo na kyato olu imbe ngwi endzi dze mani.

⁴ Ama efa le lu onyonya, kpaa ongwafo oka na tsinya ngha iPyita teyi ka to itendzi ababo.

⁵ O klese wine mi ifun kpaa li angwuto ngwi a kye ndi wo iYesu mata ladze ele, nghaduu o kaka ifun ba.

⁶ Ne iSaimon iPyita, ngwu kyan iyikpa ma, wa to si kaka lu ifendzi. O di angwuto ikwo ntona lato ifun,

⁷ beyi ayangwuto ngwi a kye bwa iYesu ikye nani. Angwuto na fulu ewon, i lake idzidza yi ongwi a ndzin mi ele mani.

⁸ Ongyɛngye yo, ongwafo oka ongwu nteyi kaka itendzi ababo na kpaa, kaka ifun ka di si noyɛɛ.

⁹ (Nghaduukpaa i gbosa lo ma mi odze ngwi Afe gbɛɛ iYesu ka kyɛɛ mi ikwu na ba.)

IYesu mblegba tu iMeri iMagidalin

¹⁰ Ta engwafo ntona yido lu ude mgbi ama,

¹¹ kpaa iMeri yo tila dze itendzi le tsukwu. Dafi o le tsukwu ne, o klese le wine mi ifendzi

¹² man di engyeso ngbi efa wo angwuto onzundze, a soto imbe ngwi a teyi kye ikwo mgbi iYesu la mani, onyi mi ikye oka mi atafu.

¹³ A byun gbɛɛ, <<Ongyaa, li ekye ngwi abu le tsukwu?>>

O gbɛɛ, <<A kyi kyelu ikwo mgbi Otse iYesu mgbi ani lu, ma ani ye imbe ngwi a kyon ka lake ba.>>

¹⁴ Ngwi o gbodze ne mata, o ndine kpatse man o di iYesu kwudze imbe nani, nghaduu o difwi gbɛɛ li iYesu ba.

¹⁵ IYesu gbɛɛ, <<Ongyaa, li ekye ngwi abu le tsukwu? Li eme ngwu abu le ndinan?>> Ongyaa na tsewe gbɛɛ o li otsungwo okwo, o gbɛɛ, <<Ongyukwo, kini abu kyon lu ya, nya ani imbe ngwi abu kyon lake mani nin nka kyi kye.>>

¹⁶ IYesu gbɛɛ, <<IMeri!>>

O kyata ine byun man kwu ela okwukwo mi ondu Aramai gbɛɛ, <<IRaboni!>> (Ngwi itan gbɛɛ otsetse).

¹⁷ IYesu gbɛɛ, <<Ka tsekwulin ba, ikyesine N yido lu mbi Otsen waba. Nghaduukpaa lu ka nya emi ongwunani gbɛɛ, <Ani le yido lu mbi Otsani beyi Otsema, mbi Imgbasho mgbi Ani yi Imgbasho mgbi ema.> >>

¹⁸ IMeri iMagidalin kye eso ne lu mbi engwafon gbɛɛ, <<Ani di Otse iYesu!>> O di nya ma gbɛɛ o nya ongwu ungwon toneni.

IYesu mblegba tu engwafon

¹⁹ Mi onode mi egbe iLadi na, ngwi engwafon kwakye yi eka ne, a kye ofe tukwu bana a le mio emi iJuda, iYesu ba wa kwudzekere idzidze mgbi ama si gbɛɛ, <<Iyu no dze yi ema!>>

²⁰ Ngwi o gbo ungwone nye ne, o gbe abo tso ma beyi esa. Engwafoon tsatsa kwuba mi ono ngwi a di Otse iYesu mani.

²¹ IYesu di gbɛɛ, <<Iyu non dze yi ema! Dafi Otsani do ani eso ne, ani kpaa le do ema ngha.>>

²² Yi odze na ta, o tufu ma wo si gbɛɛ, <<Gbɛ Onodzi Osaan na.

²³ Kini ema dzata inggise yi ali ibwubwe mgban yo, a dzanta yan, kini ema dzatan bayo, a dzanta ba sewaali.>>

IYesu mblegba tu iTomosu

²⁴ Nghaduu iTomosu (ongwu a li kwun di ong-wefa nani), onyi mbi emi iwyodefa ntona dze yi ama mi ono ngwi iYesu ba ma ba.

²⁵ Nghane engwafɔ angbeka ntona nyan gbɛɛ, <<Eyi di Otse iYesu!>>

Kpaa o nya ma gbɛɛ, <<Li kyeme ngwi ani ka di emi ambɛ mgbi ikusa mi abo mgban di kye ongwufabo ke imbe a gbokwon ikusa ntona, di kye abo mgbi ani kaan esa bayo, n ka noyeye ba.>>

²⁶ Ngwi i wa nye egbe egyata ne, engwafɔ mgban di woto yi eka, iTomosu kpaa wodze yi ama. Dafi onufozu tukwu ne kpaa, iYesu wa kwudzeke idzidze ma di gbɛɛ, <<Iyu no dze yi ema!>>

²⁷ Ta o nya iTomosu gbɛɛ, <<Kye ongwufabo mgbi abu beke mmeneni, di atabo mgbi ani. Na abo mgbi abu ba esa mgbi ani, ka tangwe wuba kpaa noyeye.>>

²⁸ ITomosu si kwun gbɛɛ, <<Otse mgbi ani yi Imgbasho mgbi ani!>>

²⁹ IYesu nyan gbɛɛ, <<Ikyegbɛɛ abu di ani nɛ, abu nu ani oyeyɛ, mse no dɛɛ yi inggise ama ndi ani ba kpaa noyeyɛ mani.>>

³⁰ IYesu kyɔ ambɛ ungwɔ angbeka okwulewo gwuba mi inai engwafɔɔn, ngwi a lɔ ma wo afɛ nɛ ba.

³¹ Kpaa ntonɛ a lɔ ma ikyegbɛɛ ni ema noyeyɛ gbɛɛ iYesu li iMedzaya, Ongwɛ Imgbasho, di li ikyegbɛɛ ni ema noyeyɛ mi iyi mgban ta ema ka tu oshishe.

21

IYesu tsetu engwafɔ egyafa.

¹ Ngwi ungwɔnɛ wa nyɛ nɛ, iYesu di tsetu emi ongwafɔɔn, mi ekyoo okwukwo mgbi iTiberia. Li itɔ ofɛ ngwi i kyɔ joani:

² iSaimɔn iPyita, iTɔmɔsu (ngwi a li kwun di ongweƿa nani) iNatanie ongwi iKana mi ɛsɛ iGalalia, emi ongwɛ iDzebedi, beyi engwafɔ mgbi iYesu angbeka efa kpaa to mbonyi.

³ iSaimɔn iPyita nya ma gbɛɛ, <<Ani le lu mtɛɛ ota-ta,>> a gbɛɛ, <<Eyi kpaa ka kɛ yi abu.>> Ta a si tase ka kaka uwaa, kpaa mi otu na duu a kwu unkonyi ba.

⁴ Mi egbegbe ototu nɛ iYesu wa kwudzɛkɛ mi agobo, kpaa emi engwafɔɔn yagba difwi gbɛɛ li iYesu ba.

⁵ O kwu ma ela kɛ gbɛɛ, <<Emi okani, ema kwu nka wa lo?>>

A nun uka gbɛɛ, <<Ei.>>

⁶ O nya ma gbɛɛ, <<Ngwi Ibriji mgbi ema mi abugye mgbi uwaa ta ema ka kwu ungwɔ.>> Ngwi

a kyo ngha neta, a yagba okwo uke kaka uwaa ba, ikye mmbweni kwuba ngwi a kwu mani.

⁷ Ta ongwafo nkpa iYesu itukwu na nya iPyita gbɛɛ, <<Li Otɛ iYesu!>> Ngwi iSaimon iPyita fwo gbɛɛ, <<Li Otɛ nɛ,>> o kye angwuto mgban ongwi eɛ tukwu (lubana o teyi kye kwulu mi ewo) man ngwa gyekɛ eni.

⁸ Engwafo angbeka ntona kyɛdo mi uwaa, a kwo uke yi mmbwe ngwi mbweele ma luba agobo, ikyesine i tunto yi agobo ba, i mɛ dafi akwubo ideli onyi hini.

⁹ Ngwi a to lu agobo nɛ, a di ibredi ladze, angola le gbɛ mmbweni di dɔdze ele.

¹⁰ IYesu nya ma gbɛɛ, <<Dulu mmbwe ngwi ema kwa kwu nɛ ba na.>>

¹¹ ISaimon iPyita toɔke uwaa di kye kwolu uke dɔke eɛ. Mmbweni okwukwo mbweele, duu li ideli onyi yi ngwusefa don iwyo diwyeta, ma dafi mmbwe ntona le kwuba nɛ kpaa uke fawa ba.

¹² IYesu nya ma gbɛɛ, <<Ba wa tiikye na.>> Onyi mi ifu ma kpaa shitukwu byun ita gbɛɛ, <<Abu li emɛ ba>> A ye dafi li Otɛ iYesu mani.

¹³ IYesu wa kyelu ibredi ma kye nu ma, di kyo ngha yeye yi mmbweni ma kpaa

¹⁴ Nɛnɛ li akpe ongwu ta ngwi iYesu mblegba tu emi ongwafoɔn mi onɔ ngwi o kye mi ikwu aani.

IYesu yile iPyita dze ofɛ

¹⁵ Onɔ ngwi a gye ungowgye ngye nɛ, iYesu byi iSaimon iPyita ita gbɛɛ, <<iSaimon ongwɛ iJon, otsitsi-otsitsi ani kpa abu itukwu ngha ungwɔ ntonɛ?>>

O gbɛɛ, <<Ɛɛn, Otɛ, abu ye dafi abu kpa ani itukwu mani.>>

IYesu nyan gbɛɛ, <<Byi mmala mgbi ani enbwa.>>

¹⁶ IYesu di byun gbɛɛ, <<ISaimon ongwɛ iJon, ani kpa abu itukwu otsitsii?>>

O nu uka gbɛɛ, <<Ɛɛn, Otɛ iYesu, abu ye dafi abu kpa ani itukwu mani.>>

IYesu nyan gbɛɛ, <<Gbɛwɛbyi mmala mgbi ani.>>

¹⁷ Akpe ongwu ta o byin gbɛɛ, <<iSaimon ongwɛ iJon, ani kpa abu itukwu?>>

IPyita wulu itukwu ikyesinɛ iYesu byun akpe ongwu ta gbɛɛ, <<Ani kpa abu itukwu?>> O gbɛɛ, <<Otɛ, abu ye alungwɔ duu; abu ye gbɛɛ abu kpa ani itukwu.>>

IYesu nyan gbɛɛ, <<Byi mmala mgbi ani enbwa.

¹⁸ N nya abu otsitsi, onɔ ngwi abu li mmafa ma, o li gbe angwuto wo ewo di kɛ imbe ngwi abu mina duu, kpaa onɔ ngwi abu yɛɛ ishongye abu ka na abɔ mgbi abu efa, inggise oka ka gbe angwuto wo abu di kye abu kɛ imbe nmina abu okɛɛkɛ ba mani.>>

¹⁹ IYesu gbɔ ungwɔnɛ ikye otso itɔ ikwu mgbi iPyita ngwi o ka wa kwu kye okwɔkwɔ nu Imgbasho mani. Ta o nyan gbɛɛ, <<Kyɛdɔ ani!>>

²⁰ IPyita kyata inɛ man di ongwafɔ nkpa iYesu itukwu na kyɛ ma iyikpa. (Li ongwu nsɔ kye ewo ge iYesu mi onɔ ngwi a le gye ungwogye ongwɔ olɛlɛ di li ongwu teyi byi iYesu gbɛɛ, <<Otɛ, li emɛ ka kye abu gya?>>)

²¹ Onɔ ngwi iPyita din nɛ, o byi iYesu gbɛɛ, <<Otɛ, li ekyɛ ngwi inggise nɛ ka kyo?>>

²² IYesu nu uka gbɛɛ, <<kini ani mina gbɛɛ no dɛ oshishe nghataa ni ani wa yɛ ba ma, li ekyɛ mgbi ema mi ele? Abu yɔ kyɛɔ ani.>>

²³ Mi ikye odɛ nɛ, ayayi odɛ gbɔfwɛ mbi emi ongwunɔn gbɛɛ ongwafɔ nɛ ka kwulu ba. Nghaduu iYesu gbɛɛ o ka kwulu ba ba, o gbɔɔgbɔ ta gbɛɛ, <<Kini ani mina gbɛɛ non dɛ oshishe nghataa ni ani wa yɛ ma, li ekyɛ mgbi ema mi ele?>>

²⁴ Nɛnɛ li ongwafɔ nkɔ obwendɛ mi ungwɔ ntonɛ duu di lɔ ma tokɛ esɛ. Eyi ye dafi obwendɛ mgban li otsitsi mani.

²⁵ IYesu kyungwɔ angbeka kpaa kwuba. Ni a ki lɔ alungwɔ duu tokɛ esɛ yɔ, n tsɛwɛ gbɛɛ esɛ duu kpaa imbe kika dɛ ogbe afɛ ntona tokɛ ba.

Etulo NT

Portions of the Holy Bible in the Etulo language of Nigeria

copyright © 2024 Initiative for the Translation and Development of African Languages

Language: (Etulo)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

156b6685-3a62-5375-95ed-97245882cc90